

四庫全書

集部

欽定四庫全書

咸平集卷二十四

宋 田錫 撰

表二

賀田重進奏捷表

臣錫言今月五日進奏院狀報十一月三日定州駐泊
都部署田重進奏殺下契丹并奪到鞍馬衣甲器械不
少者伏以師出以律動必成功天道惡盈叛必先討多
壘已平於千里捷書何止於百函中謝伏惟皇帝陛下

義軒道德湯武功勲寰區已致於升平黎庶方躋於富
壽彤闈日旰猶聽政於萬幾清禁漏殘已求衣於五夜
動園丘而感方載祥瑞畢呈左滄海而右流沙車書混
一豈謂垂衣之化未賓左袵之人舞干羽以不來出車
徒而薄伐一之日則壺漿滿道來迓王師始則汙染之
人背龍沙而歸漢土二之日或力屈來降或困猶思鬪
此乃北庭之衆依水草而擾邊疆廉頗諳練於邊機魏
尚弛張於方畧風毛雨血比驅獵於郊原神算天機已

蕩平於區域

二

臣錫言今月五日遞中報十二月五日定州駐泊都部
署田重進等奏易州十一月二十二日契丹敵軍入界
打刼遂差三指揮卻往北界二十八日打破岐溝關殺
下敵軍一千餘人收擄到鞍馬牛驢不少所有岐溝關
城內錢帛糧草衣甲及人戶舍屋並總燒蕪訖今月八
日内外文武百寮稱賀者伏以邊土捷音遠聞於旒宸

卷二十四
宸中喜氣高薄於雲天

中謝

臣竊以契丹犯境蕭關必

務於驅除猛士守方沙塞果聞於克勝伏惟皇帝陛下
躋民壽域偃伯靈臺列庭衢於八荒執玉帛者萬國契
丹獨建諸族尚未來王稽塗山後至之誅逞代馬新羈
之惠廟堂成算既增貔虎之威將帥立功式表雷霆之
怒

三

臣錫言今月三日進奏院狀報十二月十八日定州駐

泊都部署田重進等奏十二月二日殺下契丹五千餘
人收衣甲器械不少者伏以兵機貴速矧如時雨以行
師戎壘盡平屢慶使星之告捷中謝伏惟皇帝陛下王
道方融玄功不宰消厲階於邊鄙躋壽域於生靈周宣
伐獫狁之詩已流金石漢史滅匈奴之策既委廟堂千
里天山已為內地三秋沙漠永息驚烽農夫狎野以耕
桑將吏勞旋於封爵玉關虛候混書軌於外區金策告
成讓功庸於上帝臣忝權符竹限遠闕庭

賀南郊表

臣錫言於洺州伏覲今月十七日赦文南郊禮畢者禮
盛嚴裡恩覃在宥凡樂文明之化寧勝舞蹈之歡

中謝

伏惟應運統天睿文英武大聖至明廣孝皇帝陛下聖
德日新睿謀天縱晉越既歸於土宇華夷遂混於車書
貞觀太平未侔今日開元無事豈及此時公卿既上於
鴻名玉帛爰新於祀典一陽來復隨德澤以融和肆赦
從寬霈恩波而滌蕩幽囚盡釋逋欠咸蠲軍功示悅賞

之誠戎莽布懷來之信贈加風樹封及閨闈遷客官資
復以出綸之命遠人家屬遂其懷土之心念功先厚於
策勲卹物下周於掩骼連山觀象既符作解之恩率土
歡心大慶裡宗之禮臣限拘所職不獲奔詣闕庭

二

臣錫言今月五日伏覩制書南郊禮畢改元大赦者臣
已畫時宣諭訖伏以郊廟薦享神人以和至誠既達於
圓穹慶賞遂周於率土覆載之內抃躍皆同

中謝
伏惟

皇帝陛下端拱無為太平已致兆庶既躋於富壽萬靈
方效於禎祥所以祀天報光大之功為民禱豐穰之福
升禋纔畢惠澤旁流囹圄久空仍布青灾之令萑蒲無
警亦覃肆赦之恩征賦已輕更令蠲復徵償至寡咸許
復除天波蕩滌以無遺王道坦夷而有載勲庸先賞勞
効均酬俾人敦修睦之風命之封蔭延世舉卹孤之典
榮以存亡加以矜寬居作之人牽復左遷之吏和氣周
物祥光麗天所以厯授人時遂改雍熙之號禮成樂備

佇修封禪之儀臣限權六條方遙雙闕不獲奔詣玉階
無任樂聖抃蹈激切屏營之至

謝轉起居舍人表

臣錫言今月七日遞中伏蒙聖恩賜臣官誥勅牒特授
臣起居舍人依前直史館者祇膺寵命遷陟華資不離
近侍之班猥忝記言之職徬徨拜受榮懼交并伏念臣
遭遇明時踐揚清貫才識固慙於兼茂勤勞常愧於未
伸遺補美官繼塵閨籍封章鄙見嘗受聖知加以兼館

殿之清華歷藩宣之委寄榮踰始望忝已居多豈謂纔
畢嚴裡遽霑慶澤珥筆丹墀之下戀闕加深頒條滄海
之濱分憂豈稱敢志恭恪以贖貪叨

陳州謝恩表

臣錫言臣去年十二月二十七日蒙恩改授官資兼受
勅權知郡事已於今月八日上訖祇膺朝命頒守詔條
內省非臨蒞之才外任當重繁之寄感戴恩寵雖實知
榮夙夕憂惶何以致理中謝臣每念文學之性固無所

長諒直之心庶幾有補始自秘省擢升諫官初上封章
遽蒙聽納尋下御劄徧求直言仍賜臣勅書以示嘉獎
以臣所言者罷交趾之役以臣所諫者去髡鉗之刑其
餘所陳不敢備述勅書喻臣曰今後凡有見聞更在無
辭獻替或行或寢斷自於朕心盡節盡忠勿渝於爾志
臣所以嘗思啟沃上答聖明每有見聞必陳章疏非敢
沽直臣之譽但欲酬英主之知臣蓋遠人幸逢昌遇冒
涉遐阻入關知蜀道之難孤苦零丁挈家比秋蓬之轉

遇陛下初登寶位親主文衡於七十四中忝第二人及第不數年列在遺補帶館殿之職先前年擢知制誥為侍從之臣忝幸若斯報答無所去歲稍因愆亢方軫念勞臣奉勅於太一宮禱告靈仙祈求雨雪臣所以輸忠罄節因事上言言多狂愚事頗切直天聰采聽亦有施行聖慈優容幸無罪戾洎陛下受寶策以新徽號御正殿以朝千官臣以歲節假中先受恩命為差出則無例告謝未朝謝則無因立班行事捧策之儀空思珮委祝

壽稱觴之禮不與山呼戀闕之心但傾葵藿頒條之寄
若履冰淵朝廷重委之榮懼不克荷交親相勉之意亦
有所聞以臣屢因上書致茲落職雖文翰之職豈臣所
能而物論之間以臣為誠臣心匪石雖獲罪以寧辭衆
口若鉗豈達聰之有補況臣迹疎性拙言直道孤慮公
事之闕遺去天顏之咫尺敢不躬親郡政上副憂勤佩
服官箴免孤任使然錫盡心無愧期百生酬君父之恩
揣分自知重兩制比神仙之職

海州謝恩表

臣錫言伏蒙聖慈以臣莅事疎遺錄問淹滯尚寬恩宥
責授檢校右散騎常侍海州團練副使已於今月十一
日到州訖祇膺朝命感懼難任中謝臣聞懲勸欲行賞
刑必正示無私於天下表至理於區中實聖明所守之
先綱紀有常之始臣素無才識本乏聲塵每念生於劍
南鄙在草莽父母訓勵早令讀書鄉里薦稱遂謀干祿
相繼數舉未成一名洎朝廷書軌混同文物光被臣始

攜持老幼涉歷艱險往來咸秦羈旅京闕值陛下嗣登
寶位振起儒風微才不遺羣英咸至臣年三十九及第
便授官資遠不因人驟升華貫閣下三載每愧忝塵淮
陽二年遂致遺曠據其罪戾合竄遐荒尚蒙宥過之恩
俾列副戎之秩東海之郡去京不遙南風之薰順流而
下程途自便骨肉隨行罪重責輕恩深感極洩涕知幸
驚魂省躬循過咎之所因荷生成之罔極披陳愚懇雖
在表章叙罄感懷合貢歌詠謹奉表稱謝并進五言感

聖恩詩二十二韻干冒宸嚴以聞

謝量移單州表

臣錫言今月四日進奏院遞到官告一通勅牒一道責授單州團練副使散官勲如故者五色絲綸頒於海上貳車官秩移近京師既拜命以欣榮彌省躬而感懼中謝伏以禋宗云畢慶賜遂行捨爵策勲方需惟新之澤赦過宥罪遐均作解之恩臣每念遭逢驟塵清切入居綸閣莫伸潤色之勞出典郡符有悞憂勤之旨俾從左

官尚未周星爰遇嚴禋例該殊渥滄溟之上隨槎汎以
將歸白日之輝覺葵傾而愈近敢志補報仰答休明

謝特授工部員外郎表

臣錫言臣今月二十六日蒙恩特授工部員外郎為無
例於崇政殿告謝尋於二十七日謝恩訖臣伏覩臺司
引見左降官凡百餘人唯臣獨授官資復齒班列循省
榮耀不知所裁中謝臣伏以受恩獨深叙感亦切苟不
披露肝鬲敷陳始終則何以表聖人特達之恩何以見

微臣遭逢之幸伏念臣稟受之性愚直自知遐遠之人
孤危自奮遇陛下肇登寶位親主文衡臣詞藝非長器
能無取軒墀之下賜以策名科第之中復在殊級敷歷
官序便居侍從之班臨蒞公途常守廉勤之節此外不
忘筆硯載成詠歌始因進升平詞擢為諫官後因上封
禪書令知制誥遷授非次報答無由是以有所見聞輒
形章疏靡詳事理屢貢芻蕘臣子之心唯思讜切君親
之意不罪狂愚陛下所以賜臣獎諭勅書欲廣上言之

路陛下因臣特降御劄旁求敢諫之人德至明而無不
照臨道至大而無不包納臣又嘗因聖節輒貢蕪詞蒙
陛下怡天矜而優容降宸章以宣和臣又嘗因時雪輒
進歌行珠旒亦賜於披觀金口曾垂於嗟賞臣至愚至
陋無藝無能有如此微榮有如此遭遇雖殺身無補於
萬一而過分寧免於顛隲洎閣下改官淮陽典郡素無
政術但守詔條然京輔之間豪猾難理州郡之職智慮
不周負陛下拔擢之恩孤陛下憂勤之旨致有公過上

煩聖聰每思受恩既異於常倫受責亦宜於加等陛下
尚寬朝典俾副戎車不踰年逢赦量移未周歲抽歸引
見臣得生還帝里獲面天顏慶幸已多私願已適豈期
聖造復寘周行自衆多罪人之中授清華外郎之秩拜
官之後受命以來夙夜省循俯仰慙懼感君恩之特異
倍激私誠慮公道之或虧實憂官謗將何名節用贖疎
遺敢不遵臨深履薄之言守補過盡忠之訓冀伸微效
上答鴻私

代李給事惟清讓密地表

臣某言今日日伏蒙聖慈賜臣官告勅牒以本官同簽
署樞密院公事者絲綸之命恩出非常樞務之榮任當
不次循涯增惕聞寵若驚

中謝

臣聞天高聽卑陳力就

列古既存諸方策今得敷為讓章竊以臣本諸生素非
奇士偶讀書史遂玷科名遭逢盛時驟居清列才能無
取器業無聞歷官以來微効茂有常憂殞越每懼滿盈
而陛下擢於流品之中實之華顯之職陞為大諫謹言

無補於清朝遷拜冬郎駁奏豈伸於厥職才微任重既而罷錢穀之司責淺恩寬尚命以藩宣之寄番禹重地交廣要衝上奉詔條外撫荒服敷宣朝旨遵守官箴飲冰潔於誠心食檠苦其清節洎改轉輸之命慙非幹濟之才三年海濱偶免遺曠千里闕下仰戀聖明詔書爰來冕旒入覲未踰月復其官秩不浹旬授此恩榮兢惶失圖寵用過分蓋深嚴之地近密之謀非臣顓蒙所能負荷況今提封萬里守在四夷帷幄之謀軍國之務英

主裁斷近臣僉同臣也何人敢言是選伏乞陛下特迴
成命俯亮愚衷別擇才能以裨任使則微臣有妨賢之
責敢不罄陳陛下垂則哲之明必俞所讓

賀傅潛等奏勝捷表

臣錫言今月八日進奏院狀報鎮定高陽關馬步軍都
部署傅潛等奏九月十七日先鋒都監石普等殺下蕃
賊二千餘人斫到賊頭五百個奪到馬五百匹衣甲器
械不少奉聖旨取二十五日稱賀者伏以明君御宇聖

謨方協於天機猛士守方武畧咸遵於廟算果致平戎之績以成禦寇之功凡在照臨孰不歡慶臣嘗讀漢書每籌邊事當文帝承祧之始有匈奴犯塞之虞騎入雲中兵屯細柳但設備邊之策未聞克敵之功伏惟崇文廣武聖明至孝皇帝陛下道冠成康德高文景承太祖太宗之大業應無為無事之昌明三邊平寧萬物謐靜裡祀宿齋清廟方表孝思効慶靈者百神執玉帛者萬國豈鴻龍之守敢或窺伺勞貔虎之師遂行翦滅以前

茅之斥堠成破竹之功勲捷奏星馳朝聞旒冕歡聲雷
動夕徧寰區千官慶武定之基四海仰威加之德臣伏
限所守不獲稱慶闕庭

賀冊尊號表

臣錫言臣伏覩報狀宰臣百官上冊尊號者伏以聖主
承祧方親鳳歷羣臣推美爰上鴻名巍巍既與天比崇
赫赫同大明之照凡在覆載無不歡呼中謝臣早逢昌
運常事先朝見盛德大業之光輝成積善餘慶之昭報

仁莫先於守位孝莫大於揚名伏惟崇文廣武聖明仁
孝皇帝陛下寶祚傳昌璿圖毓粹三載諒陰之禮候紀
爰周千官拱極之儀推崇敢後以為至道廣大上玄崇
高經天緯地謂之文禁暴戢兵謂之武惟睿曰聖燭理
為明孝惟百行之先仁冠五常之首封章屢達聽覽方
迴冲讓合於道樞虛受符於易象尚以薦享清廟裡祀
郊丘方從徽美之稱以示後先之式恭以春秋鼎盛皇
王節高雖成康仁賢豈迨盛烈文景儉靜孰侔嘉猷慶

賜浹於華夷大禮光於典策南山在詠永隆萬壽之期
北極居尊益表千齡之運臣限拘符竹方遠闕庭不獲
從玉輅之清塵侍祠俎豆捧寶函之編簡就列軒墀

咸平集卷二十四

欽定四庫全書

咸平集卷二十五

宋 田錫 撰

表三 笏記附

賀大赦表

臣錫言臣今月十四日伏覩制書大赦天下者伏以聖德廣大鴻名昭彰報功於天推恩逮下發渙汗之大號示乾健之垂文慶賞兼行罪戾并釋覆載之內歡呼畢同 中謝 臣聞郊祀天地配享祖宗孝莫大於斯禮莫盛

於此伏惟崇文廣武聖明仁孝皇帝陛下紹登寶位繼
守丕圖英睿稟於自然仁和發於至性三載恭默萬方
平寧示慈惠則刪約條科念忠賢則委用耆舊文德在
宥禮樂居先武功其神暴亂自弭以一陽來復有事於
南郊肆赦遂行宣令於北闕澤徧天下先陽春而布和
風行域中與品物而更始釋放刑禁務寬過尤蠲復租
征招懷違叛勲勞先賞遺滯旁求惠孚惇接恩加存歿
合天波之蕩滌同壽域之躋升鳳儀九成方樂升平之

化山呼萬壽佇觀封禪之儀臣恭守詔條遠在淮表執
籩豆而侍祠祭就列無由傾葵藿而仰照臨馳誠但切

謝加勲表

臣錫言臣今月九日伏蒙聖慈賜臣官告一通勅牒一
道加上柱國者祇荷寵光不任感懼進受勲級彌覺忝
塵伏念臣幸逢昌運早踐周行東觀西垣數歷斯久內
庭外郡委任非輕慙無茂異之才上答照臨之德今以
郊祀云畢慶賞方行是先春布令之辰與物惟新之際

懋功業者酌其爵土旌績効者轉以勲階臣素無微勞亦受殊賜柱國加於上字旣荷峻遷勵節發於中誠敢忘盡瘁

行在起居表

臣錫言今月十五日遞中伏覲御劄以契丹犯順大駕親征法天道之運行舉王師以薄伐百臣受職二儀儲祥風霜助肅於皇威金玉必真於聖裕臣錫伏限所守不獲扈隨

賀聖駕還京表

臣錫言今月七日伏覩制置茶鹽司報狀聖駕正月二十
二日還京者伏以萬方係望鑾輿景從以天旋六師
凱還鳳闕策勲而飲至照臨之下歡慶畢同臣聞聖明
御宇旣任賢撫理以安民强悍犯邊則命將驅除而出
境布在方策形於詩聲伏惟崇文廣武聖明仁孝皇帝
陛下嗣啟丕圖恭臨大寶聖文神武稟自天資睿算英
謀諒符幽贊八表混同於書軌百蠻奔走於梯航詔邊

吏以戢兵來遠人以修德而契丹久隔朝化未悛禍心
侵軼邊陲刳畧生聚疆場飛奏將帥請行聖慈軫恤於
黎元大駕躬親於征討天道助順王師立功不朞月而
塞垣謐寧未踰時而車輅旋復星辰環拱既瞻北極之
尊士庶山呼佇慶東封之禮臣忝分朝寄遠限淮濱當
鳴鸞順動之時無由扈從及翠鳳迴還之日莫遂班迎
仰首堯天向日但傾於葵藿馳心魏闕朝宗空羨於波

瀾

賀德音表

臣錫言今月九日遞中刑部牒連到德音釋放罪戾及
蠲免逋欠招懷違叛旌舉勞能者已畫時施行申奏訖
伏以漢殿凝旒百辟慶朝元之禮舜絃應律萬方覃在
宥之恩凡仰照臨孰不慶抃

中謝

臣聞順時布令必欽

若於典章視朔臨軒宜普行於恩澤伏惟崇文廣武聖
明仁孝皇帝陛下動天以德守位以仁建中於民推恩
待下金玉必真於王度地天交泰於昌期以月紀蕤賓

日當初吉袞冕升太微之座星辰羅拱極之班君臣會
朝盛禮斯畢雷雨作解恩制遂行歡聲遐徧於八紘喜
氣盡浮於雙闕德音所至庶獄咸空惠渥旁流逋租盡
釋卹滯淹則吏員減選示綏懷則寇盜攸歸捐軀為國
者存歿霑恩抱器懷才者薦揚有自風行地上既符發
號之文雲起封中佇慶告成之禮臣謬膺朝寄遠奉詔
條星霜再周末展涓埃之效軒墀久別但傾葵藿之心

賀老人星表

臣錫言今月十六日進奏院錄到宰臣與百僚詣東上
閤門拜表賀老人星見并批答者伏以聖君御歷自膺
萬壽之期上帝垂祥方協千齡之運

中謝

臣聞動天以

德由誠信發於中與日齊明謂照臨逮於下伏惟崇文
廣武聖明仁孝皇帝陛下纂承二聖勤勞萬幾以大舜
仁孝之心嗣守洪業以軒皇清靜之理撫安生靈時當
太平物遇至化和氣所感殊祥遂臻南極見乎壽星東
璧燦其垂象應秋分之日當夜闌之時兆民式瞻仰黃

明潤大之色太史伏奏還社祐昭彰之符洪範休徵一
曰富二曰壽陛下富有萬國壽比南山宰臣百僚既獻
華封之祝微臣外任但懷子牟之心魏闕來歸將覲於
三載堯樽上壽阻與於千官

賀尅復益州表

臣錫言十月三十日進奏院報十月八日閤門准樞密
院劄子雷有終等奏九月二十日已取下益州城池入
城殺下賊軍三千餘人所有在城百姓並無殺害已招

安訖九日文武臣寮稱賀者伏以聖君御極當書軌之
混同叛卒逆謀怙山川之險阻梟巢既破龜城已寧凡
在照臨孰不慶抃

中謝

伏惟崇文廣武聖明仁孝皇帝

陛下謨猷天縱道德日新至信及於豚魚深恩被於草
木昨以坤維分野民或罹災井絡妖氛兵因致討成算
授之於中禁捷音自至於外區劒閣先平刀州後破王
師出如時雨儒臣應於將星果成克捷之功共樂升平
之慶臣忝分朝寄遠在海陵闕邸吏之飛申已除小寇

聞鼎司之入賀盡率具寮限守土於淮濱阻綴班於闕下誠如葵藿但傾向日之心迹在江湖空羨朝宗之浪

賀殺下王均表

臣錫言今月五日進奏院報雷有終差寄班供奉官安守忠到闕奏石普楊懷忠馬貴同共部領軍馬往榮州路趕趨潰散軍賊王均等十月三日到富順監楊懷忠馬貴前陣先與賊人相見一合殺下軍賊斫到王均首級掩殺招降到賊人并草補人員等共六千餘人奪到

衣甲器械物色不少其賊竝已翦除淨盡奏聞奉聖旨
劄與中書閣門御史臺取今月二十二日稱賀者伏以
王師所至無不成功睿畧遐宣屢聞獻捷凡在區宇孰
不歡呼中謝臣每讀邸報方樂時平巴蜀久安邊隅無
事防秋戍卒忽自叛違禦侮出師已聞翦滅由天遣之
助順見聖策之無遺伏惟崇文廣武聖明仁孝皇帝陞
下嗣守丕圖恭臨大寶躋民於仁壽之域待下以誠信
之心猛士守方以恩威而撫馭遠人受賜同覆載之生

成豈謂將校負心輒懷逆節據城池而僭竊勞師旅以
蕩除尚望生全更敢逃遯天施疎網豈漏凶徒陣有前
鋒先誅元惡斷其首領奪到甲兵掩殺至多招降不少
捷奏星馳於闕下歡聲雷動於域中益部山川永息寇
虞之患蜀城父老式歌弔伐之恩仰慶昌期彌隆景運
臣忝分朝寄介在淮濱趨玉階以無由望金門而申悃
遺表

臣錫言臣聞修短之期固有定數臣子之志空戀明時

忍死遺言瞑目長往臣誠悲誠咽頓首頓首伏望陛下
以慈儉守位以清淨化人居安思危居理思亂與宗廟
社稷為福與天下億兆為主臣無任感咽悲哀之至謹
上遺表永辭聖明臣誠哀誠咽頓首頓首謹言

謝知制誥笏記

臣錫言臣伏蒙聖恩賜臣官誥一通勅牒一道特授臣
知制誥者祇荷寵榮不勝感懼伏念臣聲光素淺文藝
非高東觀濡毫不足與史官之列西垣掌誥安能司王

者之言宜謂聖慈擢升清近續綸鳳閣慙非潤色之才
委珮龍墀忽在論思之地敢不冰泉勵節緇素研幾上
酬英主之恩聊舉詞臣之職

謝工部員外郎笏記

臣錫言伏念聖慈賜臣官告一通勅牒一道特授臣工
部員外郎者祇荷寵光不任感懼伏念臣素乏時才謬
分憂寄爰因公過出佐方州未逾年逢赦量移未周歲
蒙恩引見自循過咎敢望恩勞宜謂聖造矜容宸慈光

被俾歸郎署復齒班行敢不進思盡忠退思補過上答
乾坤之施用明砥礪之心

謝直集賢院笏記

臣錫言伏蒙聖慈賜臣勅牒一道令直集賢院者祇膺
榮命感懼交并伏念臣學識才能不偕時彥華資顯職
屢忝恩光未伸微勞復霑殊渥金殿集仙之職玉陛近
侍之恩內省庸虛益慙尸素敢不服勤儒行砥礪臣誠
上酬覆載之恩永報照臨之德

謝復戶部郎中笏記

臣錫言伏蒙聖慈賜臣官告勅牒授前件官依前充職者祇膺寵命感懼交并伏以慶賜方行殊私驟及郎曹念舊既承牽復之恩帝澤惟新實繫遭逢之幸伏念臣器能無取文學非優早敷歷於清華每兢慙於尸素豈期聖造擢實榮班復五品之華資益知忝冒樂千年之景運彌覺光榮唯勤忠恪之誠上報照臨之德

謝皇太子笏記

臣蒙恩授戶部郎中仍舊直集賢院充職者祇荷寵光
不任感懼伏念錫素無才識早玷官常爰當慶賜之
辰復荷優隆之寵此皆伏蒙皇太子鴻慈廣被睿德無
私致粉署之殊榮爰陞賤品荷儲闈之大造徒激微誠
永勵恪勤上酬覆燾

謝改吏部郎中依前直館笏記

臣錫等言伏蒙聖慈各賜官告勅牒蒙恩除授吏部郎
中仍舊充職者祇荷寵光不任感懼竊念臣等器能無

取文學非優遭逢既自於先朝敷歷驟升於清貫或綸
闡効職或史閣策名但貽尸素之譏未展涓埃之報今
伏遇陛下嗣登寶位光啟鴻圖普覃雨露之恩仰荷雲
天之澤

謝改賜章服笏記

臣錫言臣蒙恩改賜章服祇荷寵光不任感懼伏念臣
素無文藝本乏時才遭逢既自於先朝敷歷驟升於顯
秩忝塵斯久報效未伸每愧貪叨但慙尸素豈謂聖慈

曲被寵命惟新象簡朱衣念其久賜金章紫綬錫以增
榮唯勵丹誠上酬玄造

謝充彭城郡王生辰使笏記

臣錫言伏蒙聖慈差押賜彭城郡王生辰例物者祇膺
睿旨感懼交并伏念臣早受聖知累塵近職內庭差使
未踰浹旬王邸誕辰復令將命荷稠重之渥澤循省難
勝承睽注之光榮兢慙愈切

謝兼侍御史知雜事笏記

臣錫言伏蒙聖慈賜臣官告勅牒授兼侍御史知雜事
祇荷寵光不任感懼切念臣才能無取齒髮已衰尚列
軒墀每慙尸素忽沐涵濡之澤遽塵端副之榮矧以申
明典章必資諳練故實循省闇懦寧振起於朝綱仰玷
選掄但傍徨於官次敢志勤瘁上答休明

謝改諫議大夫笏記

臣錫言臣伏蒙聖慈賜臣官告勅牒授臣右諫議大夫
散官勲封賜如故者祇荷寵光不任感懼伏念臣遭逢


景運敷歷官途慙無絲髮之微勞上答君親之大造豈謂
天恩曲被宸睠猥臨寘之侍從之班授以箴規之職彌
憂官謗上候聖知敢忘獻替之誠上答照臨之德

謝覃恩笏記

臣錫等伏蒙聖慈各賜官告勅牒改授官資祇荷寵光
不任感懼伏以千年景運慶賜方行五品華資非才豈
稱唯勵忠勤之節上酬覆燾之恩

二

臣錫等伏蒙聖慈各賜官告勅牒改授官資祇荷寵光
不任感懼臣等遭逢英聖塵玷清華當策勲行賞之辰
荷稱物無私之澤或超陞顯秩或牽復舊官省循咸愧
於非才報效敢忘於盡瘁唯勤忠恪上答文明



咸平集卷二十五

欽定四庫全書

集部

咸平集卷二十六

詳校官國子監司業_臣納麟實

檢討_臣何思鈞覆勘

總校官知縣_臣楊懋珩

校對官中書_臣葉蘭

謄錄監生_臣張元任

欽定四庫全書

咸平集卷二十六

宋 田錫 撰

奏狀一

謝卹刑

右臣今月二日遇中伏奉勅書以蒸暑之時條理刑禁并賜臣優詔勉諭者纔臨畏景遽軫皇慈仰瞻貫索之文刑章已措俯閱出綸之命王道彌光伏念臣職忝分憂任當求瘼上體哀矜之旨敢忘勤瘁之心圉圉潔除

飲膳供給湯藥必蠲於疾苦水漿用滌其煩蒸每務躬親不至淹滯仁主好生之德既已昭彰微臣述職之誠唯增恭恪臣已畫時錄勅施行訖

二

右臣今月二十五日遞中伏蒙聖慈賜臣勅書一道以時及鬱蒸恩隆軫惻丁寧諭卹刑之旨慮有滯淹撫問承出綽之文彌增惕勵臣竊念早塵睿鑒擢在掖垣每畏景之纔臨觀舊章之必舉哀矜之意既得代言欽卹

之詞亦曾起草況今自為長吏恭布詔條遵俗宣風固當已任親民聽訟但守公方仰分宵旰之憂未展涓埃之效敢不屬因炎暑更切專勤疾病者湯藥必供縲絏者飲食無缺掃除禁室置給水漿重囚則無至淹延輕繫則逐旋疎理浹日常親於慮問園扉迨及於空虛上酬委任之恩共慶長贏之令仍尋錄勅散下管內施行

三

右臣今月十七日通中伏蒙聖慈賜臣勅書一道以炎

蒸之時下欽卹之詔凡守官次祇奉朝章始聞命於哀
矜次符恩於撫問愧忭交切循念尤深臣本非強明屬
當委任自分竹使再歷梅時慙無安撫之才仰副憂勤
之旨當赫口可畏南風正薰敢不上體皇恩俯遵時令
小大之獄豈但躬親夙夜在公不令淹滯至於飲食充
給圉圉潔除或水漿滌其煩蒸或湯藥療其疾病已有
先勅徧下有司謹當宣布詔條勤卹人隱協天地長羸
之令應帝王軫惻之仁

四

右臣今月二十六日通中伏奉勅書為卹刑獄兼蒙恩
獎諭者伏以天道運行既當炎暑皇慈軫卹諒協長贏
慮庶獄之滯淹憫縲囚之困苦出綸之命務在矜寬解
網之仁孰不感戴臣忝分憂寄恭守詔條敢怠躬親免
辜委任訟庭聽斷雖愧通明園扉禁留常勤決遣況刑
清事簡運屬升平令肅恩寬人無枉濫皆聖主慈仁之
所及豈微臣政理之可求丹詔遙臨特諭哀矜之旨黃

沙既啓盡承欽卹之恩臣尋依勅命散行管內訖

五

右臣今月十三日遞中伏奉勅書以候及長嬴時當炎暑獄訟之理既上軫於聖慈撫問之恩亦下及於凡品俯僂披閱虔恭奉行況宣導化風臣之職分躬親刑政敢忘專勤重輕禁繫之人無至淹滯供給潔除之事不住指揮仰副詔條勉遵朝旨順時布令合大道之昭明矜罪卹刑暢物情而舒釋人歸帝德舞詠南風之薰身

係使符恩歸北闕之下

六

右臣今月二十四日通中伏蒙聖慈賜臣勅書一道令
疏理刑獄兼加撫諭者伏以南風之薰舜絃方奏北闕
之下漢詔爰行既自邇而陟遐協順時而布令當天道
長羸之際推帝心欽卹之仁方國咸周共體哀矜之旨
園扉所繫盡承疏理之恩玄象夜瞻貫索驟稀於星彩
丹書曉讀出綸俄自於日邊臣謬以頒守六條躬親庶

獄但仰泣辜之德慙無聽訟之才唯勵恪勤庶無淹滯
夙興夜寐虔遵明慎之文事簡刑清唯樂升平之運

謝賜冬衣

右臣今月十三日祇候內品任延保到州伏蒙聖慈賜
臣紫氍毹正緜旋襪一領并勅書撫問兼賜屯駐本城諸
軍員寮等衣襖已准宣俵散訖伏以江國祁寒之際金
門慶賜之初瑞雪纔飛早梅方折俯閱出綸之詔拜手
知榮跪承挾纊之恩撫躬增感竊以臣忝分憂寄豈著

微勞揮涕淚以霑襟寧酬立造對衣裘之在笥益勵丹衷

二

右臣今月二十三日教閱內品林延壽至伏奉勅書賜臣紫敕正綿旋欄一領兼賜屯駐本城員寮衣襖已准宣俵散訖歡呼拜恩俯僂跪受詔以出綸之命宸獎難勝頒之在笥之衣戎容共悅伏念臣久違近侍繼忝分憂美服為榮敢忘益恭之訓撫躬知感寧酬慶賜之恩

三

右臣今月四日翰林待詔王祐至伏蒙聖慈賜臣勅書
一道勉諭并賜紫歌正綿旋欄一領兼賜就糧諸軍員
寮等衣襖尋准宣俵散訖伏以祁寒之節初戒於霜嚴
慶賜之恩普覃于天下守方猛士衛社勲臣宜挾纊以
頒宣表出綸之渥澤臣忝分朝寄叨布藩條慙無襦袴
之謠亦荷衣裘之賜俯伏拜慶歡呼戴恩喜動連營春
色先歸于細柳職拘守土夢魂徒繞于禁林

四

右臣今月二十八日翰林藝學光祿寺丞郝承惠到伏
蒙聖慈賜臣紫紵正綿旋襴一領并賜勅書撫問兼賜
員寮衣襖已准宣俵散訖臣忝分憂寄未展微勞爰及
祁寒例霑慶賜俯僂聽出綸之命歡呼承在笥之衣禮
厚頒裘省躬靡稱恩深挾纊撫已難勝唯堅忠恪之心
上報照臨之德

五

右臣今月八日使臣後苑打毬祇候三班奉職張珏押
衣襖到伏蒙聖慈賜臣勅書一道并紫歌正綿旋欄一
領及軍員冬衣等已依宣命俵散訖伏以祁寒初戒慶
賜咸均星使降于禁闈時服頒於郡國竊以臣素無才
術叨奉詔條歲月再周勞効未著承出綸之問諭荷挾
纊之恩榮捧圭而既覺難勝束帶而益知靡稱歡呼就
列拜聖君臨照之私感激于懷愧微臣尸素之幸敢不
恪居官次慎守公方冀伸絲髮之微勞上答君親之厚

施

六

右臣今日秋官正趙昭益到州伏蒙聖慈賜臣勅書
一道撫問并紫款正綿旋襪一領者伏以祁寒初屆慶
賜遂行天人降自於禁闈時服頒宣於外郡臣忝分憂
寄恭守詔條愧無勞能亦荷寵錫俯僂閱出綸之詔歡
呼承挾纘之恩輕煖在躬禦風霜之凜冽兢慙省已霑
雨露之涵濡唯厲丹誠上酬玄造

賀德音

右臣今月三日夜密院馬遞到勅書一道以炎蒸時序
推恩既表於哀矜輕重刑名布令普行于減降已畫時
散下管內施行訖照臨之內歡慶畢同伏惟皇帝陛下
道洽泣辜仁深解網四時合序蕤賓方戒於長羸萬物
勞懷庶獄先憂于枉撓至于言形罪已念切向隅徵無
納者悉與蠲除杖已下者罪令免放動天以德仰瞻而
貫索星稀感物以誠解慍而南薰風至臣忝頒條詔已

踰歲時愧無微勞上答玄造每遵朝旨園囿靜而屢空
方樂時康刑法措而不用

二

右臣今月十三日遞中伏奉德音應見禁罪人減降決
遣者陰陽之數亢旱有時聖哲之心宵旰為念慮科條
之尚密致刑罰之未平爰以深春稍愆甘澤遂降哀矜
之詔用彰軫惻之仁遞減重刑俾從輕典人心感悅和
氣舒以雲行天意昭彰玄貺流而雨施宣勅之日尋有

霽沍播種之時悉得霑足仁主好生之德變沴為祥烝
民受賜之心式歌且舞臣謬膺朝寄恭守詔條夙夜在
公敢忘惕厲躬親庶獄常慮滯淹絲綸爰降於矜寬縲
紲盡除其禁繫幽鑰夜動圜扉曉空睿德所覃大賴斯
普仰稟憂勤之旨俯增尸素之懷臣尋依勅施行訖

謝賜厯日

右臣十二月二十九日遞中伏蒙聖慈賜臣宣頭一道
雍熙四年厯日一軸者伏以堯帝授時之典周官頒厯

之儀君命先春感嶺梅而盡折王正告朔催江柳以俱
新伏念臣叨守六條已更三載俯閱履端之始豈勝慶
賜之恩

二

右臣令月十二日伏蒙聖慈賜臣雍熙二年歷日一軸
仍降勅書撫諭者臣久違近侍方忝分憂律厯頒行俯
僂拜授時之賜絲綸問念歡呼馳就日之誠榮抃交并
不知所措

三

右臣今月一日進奏院遞到宣頭一道賜臣淳化二年
歷日一卷者伏以皇明示信帝德先春頒寶歷以授時
平分四序表瑤圖之撫運永慶千齡拜受捧圭省躬知
感臣忝膺朝寄方布藩條讀汜氏之農書合周公之時
訓勉人耕作欣節侯以無差與衆頒行見陰陽之不忒
豈煩闕牖天道已知徒限剖符宸階尚遠

四

右臣今月十九日伏蒙聖慈賜臣咸平三年厯日一卷
者伏以日官供職既遵守於舊章王者授時遂頒行于
新厯履端於始舉正於中三百六旬七十二候開卷有
得俾人不迷慶賜所均先春而至臣忝分憂寄恭守詔
條黎元是親勸課為本紀候昭著與農書而共披陰陽
運行同聖德之廣被仰應玄造豈勝丹誠

五

右臣今月四日進奏院遞到宣頭一道伏蒙聖慈賜臣

咸平四年厯日一卷者伏以星迴於紀月周於天堯仁
既則於上玄禹服遂頒於新厯臣才非典郡任重親民
披分至啓閉之文知勸課撫綏之節所念一違天闕三
換王正寒暑往來鴻雁遂隨陽之性草木萌動葵藿有
向日之心萬國授時拜閱但欣於慶賜明堂讀今禮儀
空羨於榮觀

進賀聖節

右臣伏以千齡應運萬國同歡彩虹流渚以呈祥率土

充庭而執贄前件絹出從公帑入貢宸階用馳北闕之心仰祝南山之壽謹差某乙押領上進干冒旒宸

二

右臣伏以虹流華渚電繞辰樞凡居率土之濱咸祝後天之壽前絹出於公帑貢入明庭遇千年慶誕之辰同四海歡呼之志謹差某乙押領上進干冒宸嚴

三

右臣伏以上帝垂祥聖人誕慶當紫氣充庭之日是黃

金為壽之辰況祝堯齡皆循禹貢前件絹賦租所入京
國上供願同率土之濱用慶後天之算謹差某乙押領
上進干冒宸嚴

四

右臣伏以承天嘉節誕聖良辰凡居禹貢之封疆盡祝
堯仁之富壽前件絹邦民租賦國帑貯留用充貢奉之
儀以表虔恭之節謹差某乙押領上進干冒宸嚴

代宰相謝社日宣賜

伏蒙聖慈宣賜酒食饌餅等仲陽嘉月主社良辰錫御
府之酒漿頒大官之餅餌祇受愧惕感戴交深捧觴雖
對於堯樽借箸未伸於漢殿徒積素食之責豈勝推食
之恩臣等無任惶懼激切之至

謝除姪男昌裔連水主簿

右臣今月二十一日伏蒙聖慈賜臣姪男昌裔官誥一
通勅牒一道授將仕郎連水軍連水縣主簿者雲天之
澤俄及於私庭綸綍之恩遽加於猶子顧微勞之未展

卷二十六
慙內舉以非宜況茲敘蔭出身本因覃慶起家入仕固
無他能但以臣解縝誥之職司荷頒條之寄任遂拜章
以陳乞方積憂虞蒙宸旨以曲從特與除授里閭之內
一家增榮骨肉之情聚族知感矧於近地效此初官覃
邑之間公事不少敢不丁寧訓勵重疊諭言俾將冰蘖
之心上報君親之施

謝加朝散大夫階

右臣今月八日進奏院遞到勅牒一道蒙恩加朝散大

夫者國家以因時覃慶與物惟新勲階敘進之恩本酬殊効雨露無私之澤亦及微臣祇荷寵光豈任感懼臣竊念素無文學驟忝掖垣遭逢致身實知玷幸出入受命徒罄忠勤方解職於綸闈俾頒條于藩省階銜轉改名品遷升益為按部之榮彌勵履冰之節

謝賜御製雪詩

右臣伏蒙聖慈宣示御製雪詩者伏以聖德動天累副憂勤之念嘉祥降雪已彰豐稔之期睿藻俄新抒妍詞

於歌詠宸慈曲被俾凡目以闕觀拜捧增榮歡呼失次
伏惟皇帝陛下道超三古功冠百王日覽萬幾躬親庶
政朝廷之事無不允釐天下之民已臻至化然五行常
數稍致亢陽九年之儲素有豐備而陛下勵精益切求
理彌深以至引咎眚以在躬走禱祠於羣望聖心如是
天鑒聿彰雲觸石以朝隣千里同色雪繽紛而夕降盈
尺呈祥宿麥咸滋大田斯溥三農相慶於閭里百穀將
詠於京坻是以感兌悅於宸衷炳乾文於御唱白雲之

句固莫繼于菁英黃竹之歌豈可侔于藻麗攸宜秘之
瑤檢播之鈞天永新二雅之音式茂載歌之作臣素無
才識忝備掖垣紫薇紅藥之司已慙非據白雪陽春之
曲受賜難勝

進瑞雪歌

右臣忝分憂寄祇守詔條勸課農桑宣導風教臣之本
職敢不專勤臣實非才豈忘惕厲上賴聖德下奉朝章
所以獄訟稍稀公事亦簡禾稼大稔封部無虞唯自入

冬尚未降雪蓋明年有閏節氣較遲宿麥未妨農候不失竊聞深軫聖慮徧令禱祈果動天心聿彰報應當州今月十一日已得時雪將表年豐遠近之間必獲霑足豐穰之瑞所宜詠歌臣早以非才擢在清貫因思去歲亦是深冬六出呈祥方覩盈尺兩制同列俄受急宣俾於中書錫以良會上樽賜酒光祿移厨聖製歌行初蒙陛下宣示御筵賦詠亦令臣等進呈白雪黃竹之謠豈憂稼穡君唱臣和之美堪載策書臣亦親聞德音願歌

茂實今以大蜡之月佳雪及時揆成封非之詞上黷冕
旒之鑒干冒宸扆

進瑞麥

右臣伏以聖德所感和氣發祥既表異於來麴實殊常
于合穎豐年為瑞靈貺有歸伏惟皇帝陛下德合二儀
仁深萬彙薰絃在御應朱明長養之時秀麥乃登彰玄
造豐穰之理瑞圖所載信史可書既獻自於西疇合貢
之於北闕臣職叨長吏任重親民躬覩慶靈豈任抃蹈

金方四月
卷二十六
謹差押衙云云

進賀南郊

右臣伏以聖君纂嗣諒陰之制爰除景運升平郊祀之儀遂展凡居率土咸貢明庭前件絹帛民樂輸公帑所積用慶禋宗之禮冀伸贊幣之誠謹差某乙奉狀上進干冒宸嚴

咸平集卷二十六

欽定四庫全書

咸平集卷二十七

宋 田錫 撰

奏狀二

進應制詩

右臣昨日閤門奉傳聖旨宣召赴賞花曲宴者伏以農
辰美景錫宴追歡仰承明聖之恩方屬升平之運詩稱
在鎬豈足擬於皇猷歌有橫汾安得侔於盛事竊念臣
器能無取文學非優早塵侍從之班屢赴深嚴之召每

惟微忝常積兢慙美盛德之形容達微誠之慶抃欲陳
歌詠上黷冕旒限以閤門曾受指揮不許進獻文字今
屬上林春曉內苑花新汎蘭酒於堯樽詠柏梁於漢殿
雖芳叢應制釦渚裁詩慙非敏妙之才但抱怔忡之思
數日前輒嘗賦牡丹詩賞花詩賞花釣魚詩因得盈編
皆金門應奉之詞悉丹禁芳菲之景不敢藏秘是用進
呈與今日奉宸旨所賦詩同進歌時樂聖爰因侍宴之
辰比興緣情蓋受言詩之賜干冒嚴宸

謝賜九經書

右臣當州為無經書乞自辦紙就國子監印取九經歸
州今月若干日伏奉勅牒蒙恩却給還紙特宣賜九經
書并釋文者伏以聖人之道著在典墳英主之恩頒于
郡縣是使桐廬陋壤化為禮義之鄉鈞瀨遺民永習詩
書之訓伏念臣忝分憂寄權守詔條文翁勸學之風慙
無祖述宣父化民之道敢忘師資是以輒貢封章乞印
經籍上干旒冕方憂典憲之誅俯降絲綸特允芻蕘之

請賜詩湖外文明益播於頌聲函丈席前問學驟新于
王澤佇俟緘之緗帙寔彼類宮鄉校請觀咸遂專經之
志郡人傳寫免勞閱市之勤仰荷殊恩永為盛事

乞住漣水軍寄居

右臣近蒙恩澤量移單州榮慶之懷尋具表章稱謝行
邁之次輒有衷懇披陳臣昨離海州今至漣水訪聞網
運稍併河道未通孤舟深憚于泝流盡室復當於畏景
乞從私便須至上言進退憂虞不知所措夙夕循省豈

合徵求但以君親之恩所祈或遂日月之照洞鑒無遺
臣素以窶貧又無兼力所到之處既闕人船出陸之時
仍乏鞍乘欲乞且寄漣水以俟後時郊裡庶令親屬之
間稍遂便安之望干冒旒宸

謝許漣水寄居

右臣今月十四日伏覲勅下漣水軍狀蒙聖慈依臣所
奏為乞於漣水軍暫住以俟後時郊裡兼蒙恩便於漣
水軍請給料錢者臣伏念請求之懇雖上達於天聰憂

惕之心慮有煩於聖聽方虞罪戾難逃鈇鉞之誅豈謂
允俞俯降絲綸之命加以天慈曲被月俸仍霑卹其羈
旅之人遂以便安之志省躬懷感聚族知恩白日近於
帝鄉舉頭雖見滄波遠于魏闕回首猶賒恭俟鳳歷三
周雞竿肆赦已遂量移之志例該牽復之恩當補過以
輸忠冀酬恩而展效

謝姪男昌裔加階

右臣今月十六日遞中勅牒到臣姪男前連水王簿昌

裔蒙恩加文林郎階者伏以禮畢園丘慶覃方國自天
之澤既霽霽于寰區猶子之榮遽轉加於階級先生里
巷寵浹私庭載惟枝葉之親得與簪纓之列舉家知感
聚族為榮難酬覆燾之恩徒訓廉勤之節臣昨因謫宦
已遂量移尋蒙聖慈許寄漣水忽覩絲綸之命榮慶既
同但傾葵藿之心歡呼所共

乞直館

右臣輒披丹懇上黷宸嚴進退憂虞難逃罪戾寔貧困

迫須至敷陳伏念臣遭逢盛時際會英主謬因文學悞
受聖知塵忝既深驟列縉綸之職勞能莫展豈伸報國
之誠迨至授以正郎委之近郡時才闇懦有孤委任之
恩公過謫遷旋遇疣鴻之澤洎歸丹闕復賞通班尸祿
曠官彌深惕懼陳力就列將贖貪叨伏乞聖慈俯垂照
亮念臣曾備員于東觀嘗寓直於西垣願伸撰述之微
勞上紀文明之盛事干冒旒宸

奏魏廷式封駁

臣今月二十六日受實封勅一道為魏廷式封駁陳恕等不赴晡臨還司勅其奏狀云臣與田錫同共取旨其田錫妄奏聖君遂相矛盾臣奉聖旨令獨署名銜駁奏奉勅宜令田錫詳所奏分析聞奏右臣昨二十二日於長春殿與魏廷式進呈劄子臣未讀劄子先奏稱魏廷式將斷勅取聖旨魏廷式遂將三司鹽鐵使陳恕等不赴晡臨斷了還司勅對御披讀又將刑統第一策於御前讀曰禮者恭之本恭者禮之興故禮運云禮者君之

柄所以別嫌明微考制度別仁義責其所犯既大皆無
肅恭之心故曰大不恭於是臣遂奏云御史中丞李惟
清所奏元無大字祇稱有此不恭陛下遂取刑統看并
看元勅臣又奏大不恭有八條臣又奏曰臣按故事凡
制勅有未允當即駁正其事封還詔書謂之封駁今此
勅已斷遣了臣又奏臣昨日與魏廷式商量此勅緣是
斷了勅然不敢堅執緣張鑒是臣親情慮魏廷式有所
疑今日須至於陛下當面敷奏臣又奏曰臣於法律不

熟魏廷式本是法科成事臣乞祇令魏廷式自駁奏尋
蒙陛下謂魏廷式曰祇卿獨自駁奏又再謂魏廷式曰
卿自駁奏臣又奏曰魏廷式欲法寺定斷元條若陛下
寬減其罪所貴恩歸陛下臣之所奏陛下必一一記得
今魏廷式稱臣妄奏聖君所奏安敢輒妄魏廷式又稱
臣遂相矛盾臣緣所見與魏廷式所見不同所以不敢
與之同駁奏以此魏廷式奏臣遂相矛盾臣與魏廷式
同勾當審官院通進銀臺封駁司豈敢與之矛盾若魏

廷式所見與臣所見同即臣方敢與之同封駁若魏廷式所見與臣所見不同即臣豈敢與之同封駁臣謬因文學偶忝科名幸以遭逢驟塵華顯効官吏閤但閱圖書供職校垣曾知制誥典謨之事則嘗聞之刑律之書未嘗學也昨八月八日閣門受勅差臣與魏廷式同職勾當敢不盡忠於陛下敢不共力於同官實非妄有奏陳輒相矛盾仰祈聖鑒俯察愚誠

泰州謝上

右臣昨奉詔旨差知秦州已於今月五日到任上事訖
伏念臣素無才術驟厯官常先帝悞知寘之外制陛下
擢用列于內廷臣每憂致疎遺慙無裨益難進易退輒
效古人量材授官因告明主遂有狀奏乞歸館中兼以
太祖史書久未了畢集賢職分願効勤勞豈謂聖意丁
寧憂寄差使出令典郡委以親民告謝之時既叨敦諭
入辭之後仍有所陳遽荷殊恩累降中使再蒙召對復
得頒宣仰戴恩光實踰始望恪守官次敢不盡忠自至

臨行合有所奏爰當發日曾上實封竊計愚誠尋達睿
聽臣識見素淺年齒已衰惟陛下以特達知臣唯臣以
愚直奉陛下無因宣召面奉指揮候到本州若有公事
或入遞申發或赴闕奏來臣實何人驟承宸睠況外郡
以常行之事自素有定規若舊勅有未便之條必奏取
進止臣無任踴躍待命之至

泰州乞替

右臣輒披丹懇上黷皇明仰祈臨照之恩俯鑒憂虞之

抱臣至道三年蒙恩差與魏廷式同勾當審官院通進
銀臺封駁司事因魏廷式奏三司使陳恕已下犯大不
恭罪為所奏與御史中丞李惟清所奏不同臣所以不
敢同其所奏自是魏廷式與臣不和以此上音乞歸館
殿適值三館中差安德裕席希叟韓援宋鎬王綸李建
中張復曾會樂史路振等出典州郡時聞聖意謂臣亦
求差遣遂有勅差臣知泰州臣以本無意求出祇為魏
廷式性識龐疎難與之久處臣所以先自求退乞歸館

殿因詣崇政殿告乞免此差遣聖旨未允臣更不敢辭
免遂等候春水進發未進發間伏覩二月五日御札以
彗星見令臣下各陳所見臣遂以三月七日上章是日
至未時宣召顧問蒙恩以臨行特有頒賜八日辭朝九
日復進封劄子十一日中使至再宣召於崇政殿西閣
顧問仍蒙金口問喻甚日進發祇半年與替兼奉聖旨
或有事要面奏但乘遞馬赴闕臣到任上事後尋發奏
謝狀中亦略言訖蓋州郡常事可行即行不足更煩聖

聽但憂離違陛下左右之後或有讒謗所以臣不遂半
年與替之詔臣今在任已二年八箇月三逢聖節以官
秩未滿朝覲無由不獲隨班上壽所謂身在江湖之上
心歸魏闕之下揮涕感戀情不能忘雖夙夜在公敢不
惕厲而旦夕望替益憂疎遺兼去年曾具奏聞為臣男
長城與即今知興元府國子博士許逖家結親於今年
四月成迎訖緣許逖始因官在泰州居住臣久在任慮
非穩便願歸京師且在館殿供職伏望聖慈允臣所奏

謝得替

右臣今月一日伏蒙聖慈賜臣勅一道差膳部郎中崔維翰知秦州軍州事替臣今臣候替人到交割訖發來赴闕者臣伏念近發奏章未解所任追思替易方抱憂虞益以臣素無才能叨膺任使考秩將滿勞効稊聞雖常佩官箴敢忘惕厲而願歸仙殿庶免曠遺豈謂皇明俯鑒於忠誠睿德特容于上請今已祇受制旨恭俟替人當獻歲之令辰捧出綸之優詔俯僂拜命歡呼戴恩

路雖遠於清淮心已歸于丹闕朝覲在即榮慶交深

謝賜御製社日詩

右臣伏蒙聖慈以社節御製詩賜直館已下令依韻和
來者伏以文昭天德實炳三辰詩與道鄰式合萬象豈
臣固陋所能討論所念臣遭逢盛時伏事先帝歷清華
之職次塵侍從之榮班或上苑花時或中秋月夜得與
言詩之賜屢陳應制之詞雖采葑每愧于緣情而傾藿
但承於委照今遇陛下嗣膺寶歷恭守丕圖以秋社之

令辰慶豐年之嘉節堯樽湯鼎賜嘉會于館中聖藻宸
篇示同歡於天下物情欣戴睿澤汪洋臣既就列歡呼
覩皇家之餘慶省躬感泣觀雅道之重光敢不仰紀王
猷上膺宸旨在心曰志樂三農豐稔之時扣寂求音頌
千載會昌之運謹繕寫應制七言四韻詩詣通進司隨
狀進呈

謝賜御製重陽詩

右臣伏蒙聖慈以重陽五七言詩二首賜直館已下依

韻和者伏以千年嘉運九日良辰宸歡發于詠歌睿意
屬于豐稔雲天六義下館閣以傳觀風雅二章與星辰
而並麗臣忝竊近職灰琯屢遷遭逢聖時塵露無益憂
慙交集節序惟新良期當采菊之辰故事有登高之會
君唱臣和雖理道可發於詩聲金馬石渠而就列亦承
於宣示受命兢惕構思怔忡俯慙封菲之詞豈稱絲綸
之詔

進撰述文字草本

右臣昨五月八日蒙宣詔顧問之次臣因奏乞以經史中要切之言書於屏風寘於御座之側所貴旦夕披覽如座右銘之類臣又奏今陛下以何道理天下願以皇王之道為理臣又奏舊有御覽但記分門事類共三百六十卷取日覽一卷可周歲讀徧然不如節畧經史子集作三百六十卷或萬幾之暇日覽一卷所貴理亂興亡之事常在目前也臣欲撰進至明日又再承召對宣諭所言皇王為理之道可款曲著撰進來臣遂畧言尚

書堯舜典是帝道其注亦甚分明陛下稱朕亦常看尚
書其注頗甚易曉臣又奉聖旨令寫先帝時所進封章
臣自請假往鄭州迴尋寫先朝時所進封章已於五月
二十六日詣東上閤門實封進呈訖所有撰進文字兩
本隱其名今且各寫兩卷進呈取進止欲依此撰進如聖
旨允所奏即乞內降劄子指揮所是餘上卷軸稍多候
撰及三五十卷旋具奏草進納今詣通進司進上件草
本四卷隨實封狀聞奏

謝內降劄子獎諭

右臣昨日通進司差人送到實封內降劄子一道伏蒙
聖慈特加獎諭并以臣所進文字令餘上卷帙旋撰集
得相次進來者臣本無器業素乏才能遭逢先朝驟歷
華貫祇事陛下未展微勞昨因召赴深嚴再承顧問遂
有所奏欲以皇王之道編撰進呈遽承英睿之知特垂
聽允洎撰集之次館中將文歷令臣署字隨例勘書所
撰集既密受指揮不敢洩漏其校讐又難為訴免不敢

奏聞相次奉勅考試舉人昨已了畢遂進所撰草本取
候進止豈謂聖恩曲被睿獎遙臨退思庸淺之才曷稱
照臨之德俯伏愧荷兢惶失圖今因事復有愚誠合取
聖旨為所撰進文字卷軸稍多所有館中勘書欲乞蠲
免貴一志得專於檢閱數年方就于功夫兼得逐旋進
呈以備接續披覽仰祈玄造俯鑒丹懷

奏乞不差出

右臣所撰進文字旋進五卷訖未審陛下書於屏風已

寘座隅否所進文字

隱名

是臣致君於堯舜之心也嘗因

宣召陛下問臣所進文字幾日撰得一卷臣奏五日撰得一卷臣因以日計撰成之數一年計七十二卷五年方得成就雖五日撰得一卷然須仔細披詳慮有差錯或悞則檢會比覆以至寫淨可七日至八日方了一卷今以八日之數大槩總計一月可得三卷一年得三十六卷十年方得三百六十卷別

隱名

一十卷不在數計外

其餘已進十七卷訖餘三百四十三卷計九年餘六箇

月方始成就臣慮十年之間陛下差臣出官若臨時求
免差出是違王命也又慮十年之間陛下差臣莅事若
至時欲免差遣是違聖旨也以臣愚見若差出一郡不
過治一方孰若留臣在館殿常以皇王之道致陛下於
堯舜也若差莅事不過供一職孰若留臣在左右得以
帝霸之道致陛下於堯舜也臣始乞免勘書欲專以撰
述蒙聖恩尋有內降劄子下館中矣臣又乞借書欲廣
於聞見亦得睿旨尋有內降劄子下館中矣臣既有書

檢閱又無事牽束以副陛下降綸言獎喻之恩足以成
微臣奉聖旨著述之志今陛下春秋鼎盛英睿天資聰
政之餘好古不倦若師皇王之道日新厥德必十年之
內能致太平若遵帝霸之道夕惕若厲則千載之運永
固鴻業臣雖衰邁得見太平之時臣之私幸足矣臣雖
愚蒙得成所撰之書臣之夙願亦足矣如聖慈允臣所
奏乞御批劄子直付微臣貴無洩漏緣所撰書未成須
至慎密庶免譏謗也干冒宸嚴

奏蔭長男慶遠

伏以皇家積慶聖主誕生當斗樞繞電之辰咸思祝頌
仰日馭葵傾之際輒欲披陳願垂臨照之恩實荷生成
之德伏念臣迹惟羈旅年已衰邁忝冠侍曹叨兼憲署
風霜舉職愧未展於臣誠雨露均恩因仰祈於子蔭臣
有長男慶遠切嘗訓勵今已長成遇華封祝壽之時起
宗嗣奉先之念乞該恩例願在宦途與微臣告老之年
得嗣子及親之祿伏望陛下俯垂睿鑒恕以物情牛畜

有舐犢之心烏鳥懷反哺之性以臣子僭望式君父推恩進退憂虞不遑寧處干冒宸扆

右臣伏以忠於國莫先於至公孝於家莫重於繼世臣去年因逢聖節輒露私誠以六典素有明文五品得用資蔭遂上言長男慶遠幼能寫字長好讀書隨臣出入為官見臣日夕莅事頗知畏慎稍識公方雖文學之間未能應舉而恭謹之性足以幹家臣以年齒已衰生涯未有除俸祿充給之外無田園終老可歸慮一旦云亡

卜葬無地一家私屬失所可憂遂拜封章與長男希求
入仕及經旬月聞正郎無例該恩然臣男慶遠自来與
臣寫所奏封章與臣寫所進文字年已成立性亦恭勤
欲及臣未死之時聊慰臣有後之意望不候聖節不俟
郊禋乞陛下垂特達之恩遂微臣懇求之請況臣年六
十有三餘七年當已致仕以人生百歲七十者稀未知
七年之間得事陛下否若一旦溘如朝露永謝明時則
遺表進男亦無及矣臣不避罪責因悉敷陳伏望聖慈

俯垂憫念千冒宸庥

謝傳宣

右臣昨日中使至伏蒙聖慈傳宣昨日所上表朕已知
令安心著述文字必不別有差委者伏以王命猥降睿
旨密宣既聞命以兢榮益省躬而愧惕切以臣遭逢景
運忝竊居多欲報殊私涓埃未效念尸祿素餐之責靡
所遑寧因聖恩召對之時輒有稟覆欲以管窺之見采
撫羣言庶期日覽之時發揮古道資帝堯欽明之德副

虞舜好問之心退思學識非精見聞未博以檢閱須備
非三館固難得書以卷帙稍多非十年豈易絕筆是以
輒陳私懇上黷宸嚴方懷憂懼之心未寧丹素忽有傳
宣之旨曲賜允俞感君親獎激之恩成臣子撰修之志
供集賢之職雖愧古人繼承明之庭豈憂外任天顏咫尺
五日一與朝參聖運昇平十稔得終事業守官次莫
榮於此受聖知莫幸於斯

知雜後謝傳宣

右臣十六日中使至傳宣旨近者覽卿章奏恐有住滯
為趙誠信差出勾當不欲別差人來卿自来章疏所司
不敢住滯並總收得今日所為除改事此名位朝廷甚
難其人亦不妨撰述慮少暇可慢慢撰述候及卷數進
來但安心勿過慮或有所見逐旋聞奏不欲召卿兼今
後不更差人并降劄子去與卿便穩及今後奏狀不要
洩漏字上更著白帖子言裏面有貼黃卿自来奏狀朕
一一親覽但祇狀內著黃貼子者俯伏聞命釋愚臣危

懼之心兢榮失圖感英主照臨之德臣盖念於通進司
每下奏狀執政間或有探人古謂禁闥有九重之嚴中
堂喻千里之遠盖虞左右輒蔽聰明所以下之情誠少
得上達聞聽今陛下宣示以臣自来章疏所司不敢滯
留臣之至愚固無可采但以有所聞見敢不敷陳既一
一盡達宸聰則區區得罄臣節仍諭臣以近所除兼職
朝廷甚難其人臣實何人當茲重選將何稱職但奉至
公上酬聖知以贖官謗仍勉臣以不妨撰述候及卷數

進呈令臣但安心命臣勿過慮或有所見逐旋奏聞臣
學識非優器能無取但以遭逢景運涓埃無報國之勞
采摭羣書緗素形致君之志撰集未畢除改忽新慮構
罪尤合先敷奏豈謂封章朝達宣旨夕傳優容同覆載
之仁敦喻表慈憐之旨柏臺莅公之暇竹簡著書之餘
得以阜曩上陳丹陛雖虛佇謹直無間於芻蕘而仰鑒
融明願傾于葵藿干冒疏衷

謝宣賜弟亡孝贈

右臣昨日伏蒙聖慈以臣弟喪亡特有宣賜受命纔畢
中使言迴雖尋拜於奏章尚未罄於愚懇伏念臣自離
鄉井頗厯星霜以岐路之阻修念兄弟之契濶豈謂私
門積釁爰及連枝遠地聞喪遂陳假牒有司所奏已煩
黷於宸聰就寺舉哀忽頒宣於孝贈緡錢出於內帑酒
醴降於上樽臣實何人遽霑優渥先生里巷禮異品倫
生成仰莫大之恩存歿荷殊常之賜省循憂惕不知所
裁

謝聖旨許諫事

右臣前月二十八日長春殿伏蒙聖慈宣喻臣昨所奏之事朕一一披覽又以其人介然別無朋黨可耳仍舊令臣知之即不得洩漏者兼再奉聖旨有可奏之事但上實封以廣朕之聞見臣受命已來今已浹旬內省惶懼何以堪勝所念臣實何人一無識見但以直道早幸逢時先帝以臣遇事敢言特降勅書獎喻陛下以臣所進文字

隱名

內降劄子褒稱荷兩朝優假之恩實千載遭

逢之幸敢不益堅夙志彌勵愚誠天至高雖管窺詎識
于運行日至明而主測亦知其長短今陛下嗣守大位
臨御兆民博訪賢良躬親機務日新厥德夕惕若厲以
大舜好問之意文王猶勤之心昭九廟垂休之靈保萬
世無疆之祚臣謂蕭牆之外有可聞之事非因覆秦固
不可得而知況於遠者乎清禁之中有欲見之事不因
求訪固不可得而見況不求訪乎然為臣事君孰敢不
盡忠節明主待下常欲聞其直言春秋曰子好直言必

思自免於難詩曰既明且哲以保其身故象繫示吉凶之微異君臣保始終之分所以君不密則失臣失臣者為大臣所憎嫌為近臣所排斥憎嫌之深者則讒構其罪戾而寘之於刑戮排斥之遠者則誣枉其過咎而逐之於遐荒此由不密在於君而所失在於臣也伏念臣識既凡庸性惟愚直供職兼於臺憲蒞事在於獄刑固無微勞但憂獲罪若非陛下與臣為主則大臣必因事見誣故逐度所上實封皆乞留中不出蓋慮事不密而

身已危矣況臣無才畧安足廣陛下見聞臣之愚蒙敢
不守陛下宣諭憂畏惶恐倍萬常情

轉諫官後謝傳宣

右臣今日中使趙誠信至傳宣昨日所進實封已收得
朕亦仔細披覽但安心著撰文字必不差出如要上殿
先奏來者伏以臣誠上達必憑秦牘之詞天睠下臨忽
降出綸之旨俯伏聞命兢惶失圖竊以臣改授官資塵
忝清近志有所蓄理合備陳仰黷宸嚴方憂罪戾豈謂

皇明燭察比太陽之照臨聖造優容同昊穹之覆燾憂
疑遽釋歡抃交并柏臺既免於重難竹簡得專於撰述
況聖朝無事阜囊虛獻替之詞諫省餘閒緗帙遂討論
之志比在家修史雖遠愧於古人以戀闕著書實仰依
于明主餘取上殿進止必先有狀奏聞

謝兼史職

右臣叨列諫垣又兼史職聖恩曲被私願允諧榮莫如
之幸實多矣榮幸交集感惕彌深告謝之時雖依常例


中謝之禮莫遂對敬蓋閤門以既該勅差內殿即舊無
謝例臣雖已赴職豈敢寧心竊念臣近纔改官又乞兼
職實憂冒黷自掇悔尤豈謂人欲天從遽降出綸之命
才微識淺慙非載筆之臣蓋陛下恕以迂疎卹其衰老
實在優賢之地不離近侍之班獻替箴規敢忘匪懈述
修編撰唯守靖共時政記得見鴻猷起居注式資潤色
纂成日厯賡續季編異銘槩之微勞展涓埃之薄効諷
從五諫仰遵將聖之言運偶十齡幸紀太平之事

告假謝傳宣撫問

右臣昨日伏蒙聖慈以臣有狀暫請患病特差中使傳宣撫問兼依允所奏不差醫官者伏念臣拙於脈理昧於攝生致久病未安服餌少效豈謂聖恩之軫惻俯憐疾苦之纏綿雖自來內殿起居不敢告免因昨日隨班舞蹈頓覺衰羸以此須至上言仰干睿聽犬馬之疾既已醫治君親之恩曲加勉諭情有所感不覺涕零

奏蔭次男慶餘

右臣伏以千年慶誕之辰萬壽延長之日臣輒披丹素
上告慈仁臣男慶餘訓以詩書教之忠孝幸因聖節願
在宦途仰祈日照之明俯鑒葵傾之懇干冒宸宸



咸平集卷二十七

欽定四庫全書

集部

咸平集卷

二十八至
三十

詳校官國子監司業臣納麟寶

檢討臣何思鈞覆勘

總校官知縣臣楊懋珩

校對官中書臣葉蘭

謄錄監生臣張元任

欽定四庫全書

咸平集卷二十八

宋 田錫 撰

制誥

永清軍節度使駙馬都尉王承衍妹王氏封琅

琊縣君

勅具官王承衍妹王氏賢明為德婉淑其儀環珮中於
禮容蘭蕙藹其令範嬪於良族既詠柏舟茂我皇姻宜
封石窳載協雲雷之澤俾䟽湯沐之封

衛州衛縣簿王光圖可衛州司理

勅具官王光圖能以公才往為邑佐恭勤足以贊宰字
廉慎可以典獄刑不離汲郡之寮俾掌理官之職當思
盡瘁毋陷非辜

三司大將加恩

勅躬耕之禮用示於勸農慶賜之恩必均於効職以爾
等各伸勞績常夙夜以在公例援恩榮表雲雷之霈澤

皇城司勘契官仇延郎可銀青階兼官

將東郊
先除授

勅具官仇延郎有司上言先事列職俾靖恭于禁籍宜
時茂於朝章假以官賓兼之憲職與以階資之寵叅乎
儀衛之司恪奉斯恩毋怠所守

端州防禦使李克文落起復依舊端州刺史充

本州防禦使

勅具官李克文明於韜畧真以幹能弓箕克嗣乎家聲
符竹早隆於邦寄頃因禮制俾奪哀情洎喪紀以外除
茂朝章以斯在任當禦侮寵列頒條眷惟高要之民實

佇撫臨之政勉膺嘉命無替忠規

道州軍事推官知長沙縣趙沂可將作監丞

勅具官趙沂經術策名賓榮從事試廷評之美職藹邑
尹之嘉稱宜示朝恩俾陞京秩用酬勞績更勵恪勤

朔州觀察使左驍衛大將軍趙希贊可泰州刺

史

勅分朕憂寄頒於詔條親吾黎民行其風教惟良之命
既難其人作牧之榮實重其選以爾具官趙希贊忠貞

抗節毅勇存誠弓冶襲其慶靈韜鈴著於績效以拱衛
腹心之任委察廉風俗之能邊鄙用寧惇嫷受賜宜膺
茂賞別降璽書淮甸之邦漢符劇郡命以俾乂疇其允
釐佇騰襦袴之謠達予聞聽豈吝絲綸之詔獎爾賢能
佩茲訓詞乎予明命

太常丞張適父好問前守黃州麻城令可授太
子左贊善大夫致仕并妻封邑號

勅具官張適父好問早彰幹局之才頗著親民之譽克

生令子為朕良臣涵濡郊祀之恩翊贊宮寮之職宜膺
慶賞仍遂優榮

勅具官張適妻王氏中饋傳芳宜家稟德女範訓從於
和惠夫賢贊自於柔明宜膺䟽邑之榮用洽禋宗之澤

大理司直前青州錄事參軍麻希夢可守工部

員外郎致仕

勅具官麻希夢朕嗣位十有三載天下無事思勸農務
本躬耕籍田改元乃與物維新發號則均人之慶可以

行古道禮高年由是赦書有賜爵一級之命而希夢年
過九十以伏生之經術壽考踐歷官途而為廷尉屬僚
兼憲府之職督郵罷秩願養於家守臣上言軒墀引見
嘉其華皓是用旌陞榮之列宿之班優以懸車之秩所
以表朕養老尚齒之意也

著作佐郎梁宜可舊官

勅具官梁宜儒行克修宦途早踐嘗列秘文之府頗彰
稽古之名禮制既終朝章可復小著清選士流所榮勉

膺綸綍之恩無忝圖書之職

知廬江縣劉寅可蒲城令

勅具官劉寅雅有才名早彰官業既茂絃歌之化宜更
銅墨之資關輔之間蒲城劇邑往膺朝命撫我黎元廉
明則吏屬知方惠愛則鰥寡受賜勉高科第當議甄升
右司諫直館王仲華監察御史潘太初等母封

太君

勅具官王仲華母信都戴氏聖善之賢慈仁之訓克生

令子為吾諫官朱紱彩衣足榮具慶粉田石窠未該邑
封嘉其孝養之心特乞優隆之澤宜從子貴式顯母儀
俾新湯沐之封以適庭闈之意

前廉州刺史陳文顯可起復雲麾將軍

勅金革從權禮典既稱於無避苴麻易制國恩宜茂於
必行具官陳文顯器識淹深才謨明允著公侯之名節
彰行素之勲勞寄重圭符嘗布詔條之化禮居苦塊俾
新綸綍之恩冀移孝以資忠表奪情於優寵

光祿寺丞前知縣州彰明縣李簡能可著作佐

郎

勅具官李簡能早以公才俾權邑政而廉幹之譽聞於
使車舉奏之章達於朕聽小著清簡是命甄升更克勉
於律身勿有孤於知已

前蓬州伏虞令盧倩可華州鄭縣令

勅具官盧倩亟為宰字備著廉勤昔國家平定於并汾
當岐邑饋供於芻粟幹於事任尤見勞能三峰之間百

里之政親民命爾下車推仁勸課為先惠卹是務俾我
赤子知吾任人儻聞政聲當有升獎

著作佐郎滕玄錫可舊官

勅東觀為郎佐於著作士之清選也具官滕玄錫歷茲
美職爰屬家艱祥禫既除恩榮可復勉祇服於官次俾
允稱於朝章

前漢陽軍漢陽尉李日休可本軍司理

勅具官李日休軍壘之間刑獄尤重苟非勤幹寧應選

差閱長吏之奏章俾正名於理掾縲紲無令於淹滯絲綸豈吝於甄陞

前濱州軍事判官李準可光祿寺丞

勅具官李準恪勤宮業裨贊郡條在公既著于廉能滿秩來參於選調有司引見俾陟京寮列寺甄升勿孤朝獎

前守霸州大城令張守中可許州別駕

勅具官張守中朕昨籍田行慶渙汗推恩民之高年尚

云賜爵吏之暮齒忍棄其人爾早居銅墨之資嘗莅邊防之邑賸言衰邁爰此對敷特示朝恩俾升郡佐

密州別駕蘇德祥可殿中丞分司西京

勅具官蘇德祥早彰文價實粵通儒題別乘於百城既聞清慎俾三司於六尚允稱甄升勉膺出綽之恩無忝分曹之命

光州刺史王明可禮部侍郎

勅中臺六卿之職斯為重任而設以卿亞苟非智識通

敏機務淹詳公望素高清議惟允則何以為時瞻重稱
吾簡求以爾具官王明直方特操沉毅有謀臨事彰通
變之才奉上見盡忠之節剖竹每聞於課第蕪襦必藹
於政聲朕嘗便殿與言觀其敷奏方畧才用良足嘉稱
宜副疇咨以旌茂賞春官峻秩可以貳之禮闈崇資諒
無忝也爾識量既如彼而綿厯又如此豈煩訓告勉荷
寵光

翰林圖畫待詔夏侯延祐可廬州巢縣令

勅具官夏侯延祐早以藝能列於禁署每聞恭恪克守
官箴可以命之親民觀其莅事遂爾上章之意勿辜非
次之恩清廉可以保躬畏慎所以無過繪事後素是為
禮歟能達斯言必善為政

高麗使副判官等授官

勅朕以推恩示信覃聲教於殊鄰進秩書勲賞勤勞于
將命式表綏懷之德用旌恭恪之誠具官某遠自辰韓
來朝象魏涉滄波之萬里輸職貢於九重方物充庭達

帥臣之忠節華簪就列有專介之禮容言念使乎宜加
朝獎或紆黻從大夫之後或握蘭叅郎吏之班勲級增
榮器名非假勉荷殊常之寵無忘來遠之恩

高麗職員軍將等授官

勅具官某等列外區之右職達主帥之明誠遠涉滄溟
底其方物載念恭勤之節宜隆旌賞之恩憲府華資儲
闡美秩加以參六勲而示賞表重險以懷來無忘訓激
之辭益勵忠貞之操勉膺鳳綍歸耀雞林

禁軍將校授官

勅具官某軍旅之事朕所悉知殿廷之間今自訓閱至
於將校例有甄酬習兵鈐韞武藝是爾之事業捍邊鄙
衛國家是爾之胸襟此時立功與吾展効言念於爾無
後他人俾升遙郡之榮仍列親軍之職

勅具官某職效和門班升禁旅早習訓齊之令素彰勇
敢之名言念勤勞特加旌賞部分未遷于騎籍朝恩無
忝於龍綸勵乃忠誠膺吾嘉命

勅刺舉之任恩寄非輕廉察之權寵章則峻具官某氣
唯驍勇志則忠良禁庭居列校之班武略負兼人之藝
聞蕩寇則詞意慷慨能處衆則禮貌恭和為吾武臣深
協時論自升守土仍著風謠雖竹符以遙領之榮而襦
袴有來蘇之詠今則方當蒐乘屬在講兵擇其將領之
才副我旌求之旨必增賞秩用壯宣威名器昭其材能
車服榮於廉問服我休命爾其念之

勅朝廷武備雖在擇人爵服恩加實期報國況以廉車

之秩列於禁旅之班苟非簡在朕心何以副於公議具
官某忠能有勇智則多謀韞金石之明誠東風霜之勁
氣而能以和處衆以禮事君自錫寵於圭符聞載歌於
襦袴今國家爰因蒐乘將務平邊念既屬於貞師命宜
隆於出綍委以察廉之寄寘於親侍之行盡爾忠謀膺
吾異獎

勅車服之榮固不虛授軍旅之賞亦不徒施或先其勞
所以悅使或後其報所以酬勲具官某列在親軍職為

諸校有謀有勇盡節盡忠夙夜見其公勤委使諳其敏幹或帶專城之貴或居練武之權章綬在躬圭符領郡雖為榮達更議甄升宜加魏闕之恩可布漢條之詔俾遷要劇仍委察廉

勅親軍之職廉郡之榮藉貞純果毅之臣副委用勲勤之寄具官某名因勇立節以忠聞明誠恪事於君親銳氣誓平於戎陣而况早經任使夙著勞能識兵謀之卷舒習陣法於奇正若委之集事必能守方今命爾為察

廉膺吾之升獎佇伸報效用答恩榮

勅君賞臣以爵秩下報上以勲庸存諸典章謂之名器
具官某志懷忠恪節概矜修嚴乎師律之貞深得武經
之要自居親衛彌見公勤苟隆渥之未加於念勞以何
有特命察廉之寵用旌優異之恩

前資州內江令鍾文拯可黃州黃陂令

勅具官鍾文拯爾以內江罷秩華陽改官屬有銜除遽
聞陳乞俾換關員之命式補選調之資牛里黃陂佇聞

善政單車之任廉幹有聲咸俾吾民實受爾賜則將獎遷善職無所吝焉

前濟州金鄉令孫運可左贊善大夫致仕

勅具官孫運朕以躬耕之禮既則古先慶賜之恩必加耆宿爾早紆命服今享遐齡當殿披陳臨軒召見宜需雲天之澤俾光蒲柳之年晉秩宮坊諒為嘉寵懸車里第足遂優閒勉思渙汗之文以協貞順之吉

吏部流外鈐勒留官涿州固安簿鄭德明可陳

州項城簿

勅具官鄭德明寮佐之才勾稽之職膺茲除授勉在恪
勤儉有勞能豈無升獎

耀州司法王繼榮可邠州宜祿簿前耀州同官
尉陶化成可耀州司法

勅具官王繼榮具官陶化成一邑勾稽之任六聯掌法
之能苟非廉明寧副獎用令以繼榮佐邑理命化成列
掾曹無忝予恩勉恭爾職

前舒州太湖尉方寧可和州歷陽令

勅具官呂文仲舉具官方寧可歷陽令關員方求廉平之吏俾之撫綏而文仲稱爾理行是用命爾往莅厥邑苟三載考績課第頗高是文仲不謬舉人而爾亦不悞知已也

前大理評事呂覃可舊官

勅具官呂覃可為百行之本禮有三年之喪爾居親憂既去厥職今除禫制宜復舊官獄讞是思朝章勉稱無

忘聿修之訓更揚匪懈之名

前夏州節度推官王九言可宋州觀察支使

勅具官王九言早彰佐幕之才能舉鞠刑之職秩滿受
代課第可酬睢陽詔條方藉參贊勉荷甄升之異渥用
伸廉恪之政聲

馬守榮諸司副使

勅具官馬守榮早列班資頗聞恭謹屢膺朝委亦著勞
能向公罔怠於夙宵莅事足彰於才識苟無勸賞寧表

旌酬是用進階秩於明庭列職司於近務更觀勤恪式副甄升

如京副使劉永德可濠州團練副使崇儀副使
劉永恭可潁州團練副使供奉官劉永和可
武騎尉唐州長史

勅具官劉永德等各榮使職或列庭臣事君軒陛之間
雖經任用更爾內外之命式示遷除貳車之榮上佐之
職恪謹日守循省勿忘

大理寺法直官傅珏可廬州錄事叅軍

勅具官傅珏精彼刑書直於法寺三載既周於考績六
聯宜示於陟明用旌丹筆之勞特茂紫泥之寵爾其表
儀諸掾糾正羣司來效儻伸叙遷寧吝

衛尉寺丞張自明可右贊善大夫賜緋

勅具官張自明早以時才列於通籍嘗因左宦寘彼京
寮聞兢慎之聿修在獎升之可復青宮命秩茜綬采章
無忘若厲之誠勉答惟新之寵

右贊善大夫知大理少卿李壽可秘書丞依前

充職

勅朝廷以法律委廉平之士以爵秩賞効勞之人茂績
既彰明恩豈吝以爾具官李壽叅亞寺卿之職詳明邦
憲之微課最宜旌封章自達俾陟圖書之府以獎前勞
勉膺綸綍之恩且仍舊貫更體哀矜之旨勿渝明慎之
心

追官人韓勵已可青州臨淄簿勒停人王崇吉

可建州建陽簿

勅具官韓勵已等早歷官途當因公過既聞修省宜復
遷升各膺佐邑之榮勉贊字人之政無忝茲授俾飭自
新

除名人宗文式可東岳廟主簿

勅除名人宗文式雖效官常有虧家檢抵律既從於除
免滌瑕宜示於甄升祇命嚴祠無忝勾稽之職榮名官
路更虔如在之誠

故淄州刺史累贈太子太師李處耘可贈侍中
勅國家褒贈之恩臣子哀榮之典式昭故實可舉而行
故具官李處耘忠亮事君韜鈴立節既荷葭莩之寵宜
增漏壤之恩矧堂構之上言英琰辭之飾寵俾列珥貂
之貴追酬露冕之榮貞魂有知可膺賁贈

勅停人郭文集可邢州平鄉令

勅具官郭文集頃為宰字既失兢廉滌瑕宜示於恩榮
出綈俾新于邑理勉膺嘉命以補前非

追官人吳衡可密州安邱令停官人陳吉甫可
陳州商水尉劉鼎可晉州汾西簿

勅具官吳衡等各因遺曠追削官資既推含垢之恩宜
復維新之命或升宰字或掌勾稽當補過以省循副盡
公於錄用

相州永定令李昭嘏可濮州鄆城令

勅具官李昭嘏臨莅邑政頗著廉能部送軍儲嘗聞了
辦洎繁難之試可亦勤幹以足稱既名對於軒墀宜踐

更於銅墨撫綏勸課稱茲寵榮

太子中允御史臺推直宋鎬可監察御史

勅具官宋鎬憲府為寮公才稱職既茂強明之績仍聞
慰薦之言霜簡遷升勉服輝光之命臺綱整肅更觀糾
察之能

左贊善大夫程文度可監察御史充荆湖轉運
使

勅國家轉輸之任荆湖衝要之邦必擇周才付茲重委

厥職既稱于繁劇改官宜陟於清華以爾具官程文度
以文學策名以貞固幹事嘗莅京口鬱有政聲俾升執
憲之班往莅汎舟之役伸爾嘉畫稱予懋恩儻奏課之
有聞固陟明之無吝

賜中丞知貴州朱允元可國子博士

勅具官朱允元南海列郡貴為衝要之邦爾昔頒詔條
分憂寄而庶幹之外方畧用心嘗與轉輸掩捕寇賊谿
洞既聞於靜謐襦袴諒藹于聲光苟無旌酬寧示獎勸

是用升爾為學官之秩亦表吾通籍之間有能副予委任可以為邊吏也勉膺寵命無替始終

司門郎中知福州源護可兵部郎中依前知州
勅朝廷命南宮郎分吾憂寄而荐歷繁劇以課第上聞
者得不特隆異獎超授名曹以勸賞焉具官源護早踐
周行素彰公幹所至為理雅有政聲方茲念勞懋其成
績會以章奏達於聽聞予於寵榮固無所吝是用命爾
為司戎大夫在郎署間實為華顯東冶名郡勉布詔條

無怠初終佇聆殊効

起復如京使順州團練使石保興可落起復加

金紫光祿大夫依舊官

勅內列近司外分憂寄委任之恩斯茂旌酬之命宜隆
具官石保興忠諒存誠恭謙得禮克嗣弓箕之業頗知
鈐畧之書寵之以剖符榮之以練武而能敏於莅事勤
以奉公於貴介諸子之間無簡傲驕人之性嘗因在疚
爰舉奪情既終制以加恩必進階以懋寵勉荷惟新之

澤無忘盡瘁之心

界歸明人張崇敏康廷弼可將軍

勅具官張崇敏朕以環列之尹翼衛之班苟非忠貞寧
稱甄獎以爾名彰毅勇識蘊變通嘗受職于北廷願輸
忠於魏闕馳驅入塞既傾葵藿之心優異推恩宜濡雲
天之澤拱宸峻秩爪牙之寄攸親事主良規金石之誠
益固勉膺嘉命彌勵匪躬

勅康廷弼志東忠良心明逆順恥受讐仇之職來歸父

母之邦臣節可嘉子恩豈吝是用寘于拱環之秩總之
交戟之班賞爾勤勞襲朝廷之冠蓋表吾寵異叅宸極
之爪牙勉思盡瘁於夙宵無忝殊常之渥澤

前果州西充尉陳文廣可陳州南頓令前秦州
清水尉林思問可耀州華原令

勅具官某等民皆朕之赤子爾為朕之命官念黎庶之
是親實憐舒之攸繫以爾尉司罷秩俱聞捕獲之勞宰
邑闕員命布清庶之政勉思恭慎以答恩榮

習進士李涉可宛丘簿

勅李涉文藝飾身進修為業雖月桂未題於金榜而縣
花宜佐于銅章仍以爾父居樞近之司有義方之訓試
爾公幹列于官途勉贊親民勿忝殊渥

大名府參軍党待問可鄆州盧縣簿

勅具官党待問卑居官序頗厯公途俾伸莅事之才往
佐親民之任恪勤自勵甄錄斯酬

戶部員外郎充史館修撰胡旦可知制誥

勅朕以王道致時雍人文化天下而訓誥之職侍從之
臣必敷求其才簡拔精選俾朕約束言語與三代同風
以爾具官胡旦學識該通筆力道健傑出多士綽有文
名自中臺為郎史閣供職得春秋之微旨見褒貶之餘
才然未司吾言寧滿爾志是用升於清切之禁觀其潤
色之詞無令元白常揚專美前代勉修儒行以答殊恩

陳州叅軍劉澤可光州司理判官

勅具官劉澤移易更員佐理刑獄既資廉幹俾無滯留

爾方自乞於效官予即命之以莅事勿孤獎擢更勵恪
勤

勅賜同學究出身趙日用可徐州彭城主簿

勅具官趙日用以爾兄作掾饒陽歿于王事存亡之念
良所嗟稱昆仲之間宜加甄錄佐邑為理莅事效官慎
守廉勤以酬獎擢

許州司法朱可觀可許州司理

勅具官朱可觀爾事郡為司法掾而長吏選擇可典獄

刑無以丹筆之重輕而侮黃沙之鞠効往踐厥職勿累
知人

故容州觀察使劉文裕可贈寧遠軍節度使

勅朝廷褒贈之恩臣子哀榮之典載稽彛訓式表始終
具官劉文裕韜畧英才公侯令德稟直方之器識茂勲
績於旂常自廉問宣風化條綏遠賓海著無襦之詠佐
時圖鏤鼎之名奄忽遽聞悼傷寧弭宜舉飾終之禮用
彰念往之懷旌節之榮藩宣之秩俾增輝於寔少示追

寵于明靈貞魂有知欽茲賁飾

將作監丞朱澤可右贊善大夫

勅具官朱澤素曉習於科條備覆詳於案牘俾差推鞠
益見精勤敷奏之言明敏其事可茂勞能之賞用彰旌
陟之恩勉祇命於儲闈異增榮於閨籍

廬州慎縣尉盧顯忠可廬州合肥令

勅具官盧顯忠格令近條全火獲賊殊其考課旌以勞
能爾效官既著於廉勤舉職頗聞於屏肅宜更黃綬俾

佩銅章爾其惠卹惇嫠敦勵風俗使農桑知勸而輿賦
及期當議獎升勿忘終始

供奉官殿直殿前承旨加恩

勅具官某朝廷耕籍之儀綸綍階升之命用均慶賜以
勸勞能以爾忠於事君勤于莅事列班行而素久經委
任以居多既因作解之辰宜洽維新之寵勉成茂績以
稱殊私

樞密院押衙知客李繼敏可東明令

勅具官李繼敏職隸樞機之地服勤典謁之儀言念勞
能方行慶賜睠惟畿邑委以親民勉守官箴勿辜朝獎
襄州鄧城尉權知穀城縣事褚德臻可穀城令
勅具官褚德臻効公勤于尉職權宰宇於鄰封二邑之
民稱爾廉幹十連之帥舉爾強明俾之布政於象雷必
能綏我之赤子勉致惠和之化以酬旌陟之恩

著作佐郎郭堯卿可殿中丞

勅具官郭堯卿素有公才明於法律既達祥刑之旨尤

彰鞠獄之能洎覩敷陳宜加獎擢俾自麟臺之秩升為
御府之寮勉荷寵章無忘恭恪

御史臺孔目官門下省雜事南曹諸司勒留歸
司等官可中書省主書門下省主事千牛衛
長史及簿尉司馬勒留并出外縣簿尉

勅國家以耕籍之儀內外洽涵濡之命具官某等官曹
委質公幹小心星霜備歷於勞能雨露宜均於恩渥省
庭禁衛郡佐邑僚各勵恭勤以奉爾職

夏州錄事參軍宋若拙可著作佐郎

勅具官宋若拙爾為糾掾綽有公才載彼敷奏之詞宜
懋勤勞之績蘭臺美秩小著華資勉膺獎擢之恩更勵
恪恭之節

咸平集卷二十八

欽定四庫全書

咸平集卷二十九

宋 田錫 撰

制誥

諸衛上將軍宋渥等加恩

勅朕以躬耕之禮初畢於東郊慶賜之恩方行於北闕
矧在拱環之列早彰宿衛之勲宜茂寵章以新賞典具
官宋渥等為吾心腹列在爪牙忠貞之大節無渝英果
之威名自得功崇社稷勲鏤鼎彝擁旄疇昔之殊庸出

綽惟新之寵數恩光並及渥澤斯均俾增并賦之榮用
洽籍田之慶勉膺嘉命益勵輸忠

永清彰德等軍節度使駙馬都尉王承衍男世
隆魏咸信男亮並加階勲如京副使

勅具官某男某生於戚里為吾外孫稟明訓于義方昭
令名於士範才能可試慶賜宜均是用加珥貂騎省之
資帖執簡烏臺之秩茂之勲賞進以階資蒞於使局之
名命以副車之職勉圖成效無怠寵光

河中府推官張文琬可大理寺丞

勅具官張文琬自膺朝獎往贊藩條睠惟按鞠之能允
協察廉之政長史言薦廷臣舉揚閔稱善於衆多俾陟
明以旌賞承於法寺典彼刑章勉膺用爾之恩勿悞知
人之鑒

前趙州軍州事判官李慕清可光祿寺丞

勅具官李慕清佐彼藩條幹于王事洎銓衡之引對俾
綸綍以旌升是用擢自賓筵列於卿寺甄爾才而適用

體予意以勤公往踐厥官勿忝嘉命

前利州司戶鄭子捷可揚州參軍

勅具官鄭子捷維揚名郡命爾為參卿掾月有幣侏償
爾前勞日無公事以爾備位儻能砥礪別議恩榮

追官人高紳等授官

勅追官人高紳等各因譴累追削官資既當覃慶之時
宜霽惟新之澤廷評理掾禮寺京寮勉勵在公思補前
過

洪州觀察推官馮源可永清軍書記

勅具官劉掾舉具官馮源爾以公才列于賓席按章旌
審莅事強明廷臣舉稱是用甄獎俾掌羽書之職仍兼
霜憲之資廷評且貫以舊銜幕畫佇聞於方畧儻副知
已豈吝加恩

汝州團練推官前知絳州太平縣事路表正可

河南府推官

勅具官路表正爾以賓幕之名往莅絳臺之邑洎聞考

課益見廉能洛師按章朝命推擇勉副甄升之寵更觀
幹敏之才

勅賜同學究出身宋純可密州安邱簿

勅具官宋純爾父適莅饒陽歿于王事載念公忠之節
特隆慶卹之恩命為邑僚勉學親民之政榮其堂構俾
伸幹蠱之才

內班都知押班以下加恩

勅具官某朕以既舉籍田之禮方覃率土之恩矧列軒

墀常親左右宜均嘉慶俾洽鴻私以爾等奉上之心無渝忠恪適時之智各韞周通夙宵匪懈以在公事務服勤以成績爰新渥澤用示甄升或進以階資或榮其爵邑勉荷雲雷之寵更增班秩之榮

前著作佐郎楊巽可舊官

勅具官楊巽爾以文學之稱列在圖書之府既終喪紀宜復朝章與祕省之清資實士流之嘉選服勤儒行砥礪時才別俟恩榮以伸器業

儒州縉山簿李文益可太府寺主簿

勅具官李文益吏能廉謹佐宰邑以效官經術該通在
王門而侍教爰因朝慶是陟府僚詩書訓導之能方資
師授典籍勾稽之職更試公才

起居舍人李若拙可鹽鐵判官

勅朕以管榷之利軍國是資必求經濟之謀委以重繁
之務以爾具官李若拙素有文學藹然聲光加以通明
善於操剗珥筆軒墀之下直史是咨運籌征賦之能幹

時攸屬勉倖銅鹽之職更觀盤錯之才

幕職加官

勅王者展籍田之禮慶賜遂行賓從列幕府之榮寵章
斯洽具官某等咸懷器業素蘊籌謀或樽罍疊疊之談
能申婉畫或牋奏翩翩之俊俱藹聲光渥澤宜均華資
式叙粉闥兼秩勲籍增榮勉揚裨贊之才用答優隆之
命

秘書省正字劉巨川可太常寺太祝

勅具官劉巨川朕以爾父歿于王事念往卹孤命爾效
官列於秘閣當慶賜遂行之際申賞延於世之恩勿墜
家聲勉揚官業

勒停追官人林嶠等加官

勅勒停前某官某嘗因譴累除削官資既逢慶賜之辰
方舉棄瑕之典任寮軍倖尉掾奉常勉膺霽霈之恩以
補曠遺之過

堂後官一十五人轉官

勅國家行籍田之禮覃慶賜之時以爾具官某等素以才能彰勞績丞相之府既列職以為榮王者之恩方出綸以均寵蘭臺美秩棘寺華資勉祇荷于寵光更靖共於官次

守當官等二十人受官

勅具官某等各以勞能勤於職次既偶覃恩之際可膺進秩之榮宜錫階資或升佐職題輿初命勉荷殊遷無忘夙夜之勤以答雲雷之澤

故諫議大夫劉保勲可贈工部侍郎

勅生享顯秩歿有追封表君親終始之恩彰臣子忠貞之節況歿於王事殲我邦良宜因覃慶之辰特茂飾終之典故具官劉保勲早登華貫素藹嘉稱玉琯融和粹之誠冰雪瑩潔清之操踐更臺閣茂著風猷正直表於搢紳簡廉允於公議洎遼朔平戎之役見馳驅盡瘁之勞哲人其萎悼百身以何贖徽章有贈加三襚以寧忘是用旌爾貞魂因予大慶冬官亞卿之秩可賁漏泉勤

王隕命之靈諒歆玄澤申恩念往貳表予懷

前大名府朝城令劉昇可京兆府鄠縣令

勅具官劉昇字邑里部送軍儲聞勤幹以奉公因疾
痛以離任痊損引見除授攸宜鄠社之間賦輿為劇臨
蒞之際庶慍居先親吾之民勉爾善政

宋州寧陵尉趙全可本州左司理

勅具官趙全朕以州郡理獄之掾必委庶勤聞爾作尉
寧陵頗彰公幹宜膺新命往蒞厥官儻囹圄以屢空加

綸綍而豈吝

開封府祇候都孔目官左右軍巡使及諸王府

內知客等加恩

勅國家因慶覃恩自邇及遠矧京府左右之職王門親
近之人必均寵榮用甄勞績具官某選於班秩擇以公
才俾祇事於磐維觀恪勤於夙夜果能盡瘁匪懈畏法
保躬式當作解之辰宜洽維新之澤勉膺嘉命益勵忠

誠

西頭供奉官白守琪可崇儀副使

勅具官白守琪朕以儀衛之司副使之職必求公幹用
稱甄升以爾自列班榮亟膺任委恭恪盡忠之節周通
莅事之能備作彰聞可以遷陟式予職局展乃時才儻
著勤勞更茂光寵

耀州節度李繼捧母漢陽郡夫人吳氏可進封

南陽郡太夫人祖母河西閭氏可特進西河

郡太夫人

勅耕籍之儀則后妃獻種陸之種閨闈之慶則命婦進湯沐之封具官李繼捧母賢和並茂貞淑允修榛栗得婦贄之容蘋藻協母儀之訓生育令子為吾帥臣剖符仗鉞之榮既彰家範石窋魚軒之貴宜懋國封勉遵內則之規佇奉公桑之禮

東頭供奉官折御冲可崇儀副使加階勳

勅具官折御冲早列通班素彰勤績祇命屢膺於任使莅官備悉於器能是用旌酬以勸勞効帖以省秩兼之

憲銜仍觀適用之才俾列副車之職勉於忠恪以答恩
榮

故左僕射致仕贈侍中沈倫可追封魯國公

勅追榮念舊悼往申思方當覃慶之辰宜舉飾終之禮
故具官沈倫巖廊耆德社稷純臣輔邦國以貞方遺子
孫以清白儒行昭明於信史忠規模範於縉紳既諧止
足之誠遽起殲良之歎徽音豈昧慶澤宜優龜蒙進大
國之封洙泗協漏泉之澤式揚嘉命以慰英魂

六宅副使張茂宗可西京作坊使

勅具官張茂宗嘗以文學早策科名爰自清班俾從使職謙恭周慎所莅可觀勤幹通明何用不適雖未周歲律而益見時才宜自副車之名序遷繕工之局表文武之無濟彰委任於踐更勉答寵光別伸殊効

宰臣三代追封

勅國家覃慶賜之時幽顯迨追崇之典實因賞以示勸旌貽厥以延恩某官某曾祖母淑善慈仁既作嬪於祖

德賢明軌範果垂慶於孫謀宜其光大庭闈昭宣輔弼
湯沐遺榮於封國雲雷飾寵于漏泉

皇姪孫惟敘等三人加官

勅朕以勸勉三農既舉籍田之禮敦敘九族宜均出綽
之恩所以榮茂本枝繁昌奕世也皇姪孫某等岐嶷早
彰于令器溫恭自毓于賢才閱詩禮以飾躬諷圭璋之
比德或慶隆朱邸或粹稟青宮協雅頌之振振錫貽謀
之翼翼是用榮之階爵列在拱環蕪中臺端揆之資加

憲府準繩之秩增其勲賞進以戶封爾其礪行以砥名
勿怠推忠而盡節佩此明訓為吾令孫

致仕分司等官加恩

勅國家行籍田之禮內外覃慶澤之恩比雨露以咸均
協地天之交泰以爾具官某等各以才行萃列班資或
洛邑分曹荷朝章于結紱或燕居優秩得禮典於懸車
增其井賦之榮茂以勲階之賞俾膺嘉慶以洽鴻私

押東郊進奉衙內指揮使并衙前職員等加恩

勅籍田之禮所以獻種稔奉粢盛躬耕既畢於三推覃慶是均於萬國某等各以將命來貢明庭宜嘉勤恪之誠俾浹濡之澤勉膺寵異更勵公忠

翰林書畫琴阮醫藥等待詔加恩

勅籍田之禮久廢今朕行之慶澤之恩既普與衆同之某等技藝精通履行純謹各奉禁林之職夙彰藝圃之名覃恩既洽於涵濡祇寵勿忘於惕勵

中書守當官李恭等五人可簿尉

勅具官李恭等各以公勤供於職次既布維新之慶宜
膺懋賞之恩邑佐親民尉司主盜廉慎勉修於爾業甄
升寧畧于朝章

追官人張仁操等除官

勅張仁操等有過則既正典章遇赦則必該慶賞宜霈
龐洪之澤用昭蕩滌之恩改行自新以酬寵渥

攝太祝郭賁可正太祝

勅具官郭賁朕昨率古禮耕籍田祀先農遵故典而太

常六祝或有攝官以爾賁恭命祇肅奉職勤勞必也正
名以示優渥爾其砥礪用答恩榮

知制誥制

勅朕嘗讀漢書閱其制詔譽不過實詞不近誣有周官
之遺風得王言之大體深詳其旨嘉歎久之今命詞臣
典於文誥豈惟周漢之制抑慕唐虞之文苟非無才寧
副茲選以爾具官某名卿之子修身踐言士流之間好
古博雅策名以文章之價莅事有廉幹之稱宣室召之

而與言相府命之以再試甚有辭彩可以甄升是以寘之掖垣觀其識用爾其秉筆立意代予措詞必有宗師勿近浮鄙俾一時訓誥為千載典謨也

二

勅朕每讀易至言出乎身加乎民行發乎迺加乎遠未嘗不惕然增念所以言必顧行行必顧言書之為典謨用之成風教以爾具官某素有文學可掌絲綸爾知朕之言乎懲惡不近誣獎善不過譽爾知朕之行乎舜聞

一善以服膺湯務日進以為德爾秉筆之際斯言莫忘
拾遺直史館制

勅諫垣之職史閣之才必文學可稱聲實相副加之識
量方協簡求具官某文必宗經學實為已清慎簡直溫
恭粹和自中第於時髦既効能于官業聞其聲彩是用
詔徵列獻替之清曹觀紀述於直筆斯為嘉寵爾其勉
之

二

勅書館之職不限資地亦無常員惟文學兼著名識交
茂者得與茲選以爾某策名時俊流譽科場修辭益勤
為學自懋洎試之莅事亦藹然有聲是以召詣公車待
問宣室茂秀文行果稱詢求筆削箴規可以超獎佇諫
垣之風彩揚史閣之聲光副予憐才無忝厥職

三

勅朕以六經之術化於人以三代之文訓於下俗用丕
變才亦挺生時之得人斯亦為盛以爾某精用意於為

文無倦勤于積學自擬科第迨歷官常藉藉之名流在
衆口翹翹之選簡于朕心是用升之諫寮實為良史佇
爾匪躬之節伸爾執簡之能無俾得人專美前代

著作直館制

勅蘭臺著作史閣清華苟非其人何以輕授以爾某策
名俊造馳譽輩流試之臨民善于為政專於好學敏於
屬辭吾東觀有書可以資爾之游泳直館之職足以榮
爾之聲光

二

勅麟臺有著作之局晉則專掌注記唐則兼撰碑辭稱
是職名必擇英茂以爾某敏於為學長於屬辭性稟貞
方識亦通悟寘之祕閣足茂爾之聲光閱我羣書更廣
爾之聞見無忝甄擢以孤恩榮

諫議大夫制

勅朝廷設諫諍之臣舉箴規之職雖云慎選實在無遺
何以忠讜在乎人而用舍由乎上或直言未當或敢諫

不從徒為備員適謂虛器也以爾某素有文學頗歷官
常効用以來聲塵有得觀其風度之淹雅贖其理行之
貞方是用升於諫垣列為近侍六典謂事之大者廷諍
事之小者上封爾無越思靖共斯職爾無養望或忝厥
官佇聞謇諤之名稱我清華之選

幕職州縣官料錢勅

勅王者設官分職求才任能俾庶績以允釐即黎元之
受賜然責其廉則豐其祿督其理則足其家朕自臨御

已來十有四載或親民之吏或佐幕之寮觀其考課之間悉乃廉平之績苟不均其資俸何以絕其覬覦自來應幕職州縣官料錢皆一分見錢二分析色今有司建議事貴酌中宜令今後中停支與見錢一半支與折色俾令稍足更勵向公凡爾庶僚勉荷優渥

咸平集卷二十九

欽定四庫全書

咸平集卷三十

宋 田錫 撰

考詞

錄事參軍朱適

具銜朱某糾轄勤廉監臨辦濟檢身守法精意奉公詢
於衆人甚有清譽據考課令明於勘覆稽失無隱為句
檢之最一最以上有一善或無最而有二善為中上朱
適明于勘覆稽失無隱之外有清慎明著之善考課宜

為中上

涇縣簿王中古

具銜王中古考課之令品第有常功即明言過亦具舉
示否臧之必信與黜陟而可憑王中古既職簿書兼司
冠盜閱其所理良亦能官獲賊之功以勞可賞輸銅之
罰非已受贓依長定格宣省有殿罰者其考亦降一等
今考宜書中下

太平令賈昭偉

具銜賈昭偉宰理太平綿歷二考版圖閱戶數及三年
地賦所征總有二萬國家恩信逮下凋弊漸蘇而能蒞
事施勞在公無過考課品第格令分明善不妄加詞尚
摭實今考依書中上

太平簿張誦

具銜張誦披詳考帳品教政能市肆無賒苛見其廉也
宣省無責罰知其寡過也擒獲正賊表其有功也佐理
一邑彰問三善飾辭難下恐亂否臧實行可稱信若符

璽依令與格考書中中

南陵令孫甚夷

具銜孫甚夷國家克復江南選擇良吏委之宰字俾無凋殘孫甚夷邑在南陵政稱寬簡版圖計戶流者旋歸輿賦常程欠者有納准長定格第二考且書常考宜曰中上

南陵簿楊光益

具銜楊光益佐理南陵諳詳吏道郡中諸掾稱舉其名

無何司寇闕員俾之承乏觀其所理勤恪廉平召而與
言謹密恭遜泊來書考再審厥官在任無曠遺莅事能
幹辦初考獲賊准格不許更書今考獲賊依令得以稱
善據考課令四善二十七最中恪勤匪懈為一善職事
修理供承強濟為監掌之最一最以上有一善為中上
品較諸邑課績可稱雖進考有文而定格難越俟至終
考旌陟良才今依書為中中

寧國簿康震

具銜康震邑有萬戶闕令與尉能兼其職善守厥官有
司稱刑獄無冤考帳見宣省無罰頻獲盜賊良辦徵輸
考司憑品較之詞直筆絕否臧之幸依按格令書曰中
中

宣城令母克溫

具銜母克溫宣州六邑宣城居首閱其版籍僅二萬戶
較其租賦盈十萬數兵戈之後災歉相仍凋瘵之餘葦
理非易母克溫植性寬簡莅事廉平既闕佐寮又兼捕

盜考較在任自無踈遺品第其功依書中上

司法參軍張玄珪

具銜張玄珪精詳法書諳熟吏道勤廉通悟而秉節無
渝遜順恭和而臨事有斷聖朝平復疆土擒滅姦雄吳
之輿區宣為劇郡習俗未深於教化比年仍值于凶荒
民貧盜生自擬刑網訟多事冗空黷政條張玄珪三載
莅官庶事能理有司勘帳稱獄無冤考狀較能直詞無
愧據考課令推鞠得情處斷平允為法官之最公平可

稱為一善有善有最書為中中

涇縣簿王中古

具銜王中古莅官以來今滿二考邑吏供帳府掾按辭課績有無臨莅臧否煥然斯在可得而書徵督租征多及分數取責市肆稱無賒苛仍獲賊徒足為功課今依令格書為中中

旌德簿劉德元

具銜劉德元詳覆版圖考閱帳狀旌德名邑令尉闕員

能兼厥官無曠所理擒捕盜賊徵督賦輿詢會有司比
較終考無宣省責罰無市肆賒苛臨莅疲民庶幾奉職
按格考第書曰中中

錄事參軍朱適

具銜朱適宣城之郡古號名藩皇風近被于全吳遺俗
尚疑於大信民鮮畏法獄不暇空矧以歲徵之征踰五
十萬月供之籍僅百餘帳管庫出納儲庫支收勾稽簿
書主掌刑禁適莅厥職衆稱其廉平任再周課考有令

善最如一品第無私詞何敢誣書為中上

南陵令孫甚夷

具銜孫甚夷自宰南陵已周三考常式備書於茂績有司上請於直詞湖鄉地卑水潦繼作吳中俗薄恩信未知加以農鮮服勤逃者大半賦有常限勅有倚徵課第臧否帳狀可覆詢於掾吏援行格文事有可憑許書常考曰中上

南陵簿楊光益

具銜楊光益司寇改為司理聖朝新典也楊光益召自南陵權理院事將僅周歲乃得替人有司具舉其勞能常式請書其考第因閱所斷之獄杖刑三百七十九徒罪三十五大辟五十六輕繫遞罰總而計之凡七百餘人吏稱廉平人無怨讟直筆旌顯書曰中中

寧國簿康震

具銜康震寧國萬戶之邑征賦管權僅十餘萬朝廷選吏難可其人震莅厥官令尉俱闕上無宰字之政下總

擒捕之司邑無流民人鮮為盜徵斂云足征利弗虧衆人悅寬裕之心諸邑推辦集之地按考帳而下直筆固無矯焉考書中中合終考之格令也

司法參軍張玄珪

具銜張玄珪國家長定格考課條件凡一十有六應州縣吏員考滿未替在任復經於周歲有例許書於四考張玄珪掌用筆定刑之外兼權戶掾仍主勾司錢穀簿書常勤較覆賦輿條限靡住舉行戶雖有逃稅幸登數

詳條內災沴之處許得常考六邑乃江湖之地頻年罹水潦之災考書中中亦合常式

宣城令母克溫

具銜母克溫在蜀乃公卿之後聖朝受擢用之恩渡江而南莅宣首邑性寬裕政簡易在任滿四載今書第四考夏徵之賦及九分已上災傷水潦戶逃二千四百按格令之常式詳考課之舊條直筆無私書為中上

太平簿張誦

具銜張誦與賈昭偉共理太平之邑俱滿三考司分雙
伸于考帳品量各見其官才戶口存亡賦輿納欠課績
次第臧否無殊書為中中循舊式也

太平令賈昭偉

具銜賈昭偉國家設考課之法官吏在任功過必書將
以憑臧否而定黜陟也江南歲多不稔農鮮服勤信卜
筮而佞鬼神棄耕桑而從網罟是以民無土著家無積
儲太平在公邑之間土田瘠而物貨薄災傷之地常考

可書今依仍第二考書為中上

涇縣簿王中古

具銜王中古涇州獨理考限三周常程賦租徵斂有足
全火盜賊擒捕無遺品第功勞直詞無愧中中之考依
格而書

附先君贈工部郎中墓碣

先君諱懿字伯達嘗誨諭曰余世本京兆人因唐末亂
離僖宗幸蜀爾祖徙家至於此錫披譜牒錫高祖開曾

祖易直祖誠皆高尚不仕先君好術數聚書數千卷博施濟衆交親有婚嫁之累而窶貧者悉為嫁娶焉捐館之年無疾而終嘗先會鄉里別親族大署於廳事之南廡壁曰亡六月二十三日果於是日終焉蜀後主時陵州刺史趙庭讓聞先君好古博施之名署攝本郡司馬享年四十有八以丁巳年六月二十三日終乃周顯德五年蜀廣政二十年也冬十二月八日葬於縣西北歸仁鄉崇教里大塋也先君嘗作壽墳既而筮之曰斯墳也吾不

得而居之洎歿後果別卜宅兆而葬焉先夫人楊氏世以孝行稱事舅姑以孝聞婦道母儀合於詩禮甲寅年十一月五日終享年四十三乙卯年春二月葬在先君墳西南五十步以龜筮叶從不宜行合祔之禮由是先君之葬同大塋而別封樹錫兄弟三人兄繼雲錫名繼沖後改曰錫弟繼英姊一人適宋知讓妹二人仲適鮮延壽季適楊懷貴俱以令淑聞雲後更曰筠錫入關拔解開封府寄應首薦御前就試太宗嗣位之三載歲在

戊寅九月二日一舉登第釋褐將作監丞歷著作郎左拾遺右補闕起居舍人知制誥兵部員外郎戶部吏部郎中弟英在故鄉守先人之舊廬錫弟兄相次云亡兄亡於鄭弟終於蜀錫幼好讀書慕揚雄相如為文先君曰觀爾之性必先光大吾門也當立身揚名勉副吾望乎爾也歷諫省拜章言事太宗以勅書獎諭曰勅田錫省所上書具悉汝賢路奮身諫垣就列罔效循循之輩竊祿居官思齊諤諤之臣拜章言事適符虛佇諒慰深衷

朕頃以交趾封郵非時怙亂廣南轉運有狀奏聞言其
王師之衆枉被賊臣所害念其曾未效貢豈可不為救
焚爰命偏師往安彼俗固不貪其土地況尋罷其干戈
且如京西閒田素來窪下就開池沼良有其由一則以
安泊戰船一則以澄渟水潦既益皇都之壯麗亦資士
庶之遨遊況其執役之流皆是下軍之士固不曾差驅
編戶妨奪農功又如髡鉗之刑前王所用若比之於劓
剕諒有其等差且令斷頸之徒得遂全身之路誠非酷


法却大好生自覽爾封章固亦軫余懷抱見令檢尋制度別較重輕今後凡有見聞更在無辭獻替或行或寢斷自朕心盡節盡忠勿渝爾志其於嘉歎無廢寐興故茲獎諭想宜知悉洎太宗晏駕皇上嗣位太宗所賜勅書已編於實錄矣先君訓諭之言俾立身揚名以光門族幸兩朝遭遇聖主身既立而名已揚矣先君累贈工部郎中先夫人追封京兆縣太君慮年紀寢遠乃撰表墓之碣立於先君夫人二墳之間嗚呼霜露之感載懷

怵惕風樹之悲無所迨及思畫錦還鄉而未遂涕泣西望因嘉州通判大理評事萬簡赴任托召妹夫楊懷貴與姪嗣宗同訪求貞石以刻斯文時咸平五年歲在壬寅冬十月十日嗣子朝請大夫尚書吏部郎中兼侍御史知雜事上柱國京兆縣開國男食邑三百戶賜紫金魚袋錫撰述

欽定四庫全書

咸平集
卷三十

十一



咸平集卷三十